

INFO



CENTAR ZA KULTURU,
SPORT I INFORMISANJE
BUŽIM

Info-bilten općine Bužim | Broj: 7 | januar-decembar, 2020. | www.ckbuzim.ba



**U RAD PUŠTENA RASVJETA I PODIGNUTE
ZASTAVE NA TRGU ALIJA IZETBEGOVIĆ
U BUŽIMU**

**FINALIZIRANA JE REKONSTRUKCIJA
ULAZNE KAPIJE I BEDEMSKOG ZIDA
STAROG GRADA BUŽIM.**

**OBILJEŽENA JUBILARNA
25. GODIŠNJICA
PROGLAŠENJA OPĆINE BUŽIM**



UVOD

Poštovani čitaoci,

Ovaj Informativni bilten je namijenjen Vama dragi građani Općine Bužim, bilo da ste u domovini ili dijaspori, te svima ostalima koji žele pratiti rad načelnika Općine Bužim i sve ono što se događa u Vašoj Općini.

Moj kabinet je uvijek otvoren za vaša pitanja, ideje, prijedloge i sugestije. Naša misija i zadaća je da Općinska uprava mora biti servis građnima. U ovom biltenu možete naći najznačajnije informacije koje su obilježile 2020. godinu, te ostale korisne informacije od značaja za sve građane i posjetioce Općine Bužim.

Iskreno se nadam da će ovaj bilten poslužiti kao sredstvo dvosmjerne komunikacije načelnika Općine Bužim i njenih građana, kao i sredstvo promocije naše lokalne zajednice. Uz vašu podršku i učestvovanje znam da ćemo stvoriti bolju, ljepšu i prosperitetniju Općinu Bužim.

Ukoliko imate prijedlog, kritiku ili interesantnu informaciju, pošaljite ih putem e-maila na adresu nacelnik@opcinabuzim.ba ili putem faksa na broj +387 37 410 031.

Vaš načelnik Mersudin Nanić

SADRŽAJ



CENTAR ZA KULTURU,
SPORT I INFORMISANJE
BUŽIM

KABINET NAČELNIKA	2
INFRASTRUKTURA	18
KULTURA	41
PRIVREDA-POLJOPRIVREDA	50
SPORT	54
OBILJEŽAVANJA	62

IZDAVAČ:

JU "Centar za kulturu, sport i infomrisanje"

505. Viteške brigade bb / 77245 Bužim

Tel / fax: +387 37 410 332

E-mail: jucksi.buzim@gmail.com

jucksi.buzim@bih.net.ba

www.ckbuzim.ba

DOBRODOŠLICA NOVOIZABRANOM NAČELNIKU OPĆINE BUŽIM

Uposlenici općinskog organa uprave su na dostojanstven način ispred zgrade Općine Bužim dočekali izabranog općinskog načelnika Mersudina Nanića, te mu sa gromoglasnim aplauzom poželjeli dobrodolicu na novu/staru poziciju. Uposlenici su čestitali načelniku na pobjedi, te mu poželjeli puno sreće i uspjeha i u narednom mandatnom periodu od četiri godine.

Odmah nakon prvog dolaska na posao poslije održanih lokalnih izbora općinski načelnik Mersudin Nanić održao je i prvi radni sastanak sa svim uposlenicima općinskog organa uprave na kojem se zahvalio na toploj dobrodošlici koju nije očekivao ali je u svom obraćanju posebno naglasio:

“Očekujem od vas da od danas politiku ostavimo ispred vrata ove zgrade i da zajedno radimo u interesu građana zbog kojih i jesmo ovdje. Očekujem da svi odgovorno rade svoj posao onako kako to najbolje znaju, očekujem da prema našim građanima budete ljubazni, otvoreni i da radite u skladu sa zakonom. Ne očekujem ništa više ni manje ali jednostavno se moramo staviti u službu građana koji to od nas i očekuju. U narednih nekoliko dana napravićemo detaljnu analizu i prema toj analizi postaviti naše prioritete. Očekujem da će svi dati svoj maksimalni doprinos u razvoju naše lokalne zajednice i stvaranju bolje klime za nove investicije i nove projekte “.



IZABRANI SMO DA RADIMO I GRADIMO

Nakon održani Lokalni izbora 15. novembra aktuelni načelnik Mersudin Nanić ponovo je dobio povjerenje građana Bužima, ovaj put sa skoro 4000 glasača. Općinski načelnik evo već danas sa svojim timom nastavlja sa radom i pozitivnim pričama, gdje je zajedno sa saradnicima obišao radove koji se izvode na području naše općine. Prvo je obišao radove na izgradnji i rekonstrukciji nekategorisanih puteva koji su ostali da se urade u sklopu programa „Marka građani-marka Općina“, te je nakon toga obišao i završne radove koji se izvode na Trgu „Alija izetbegović“, „Obavezuje nas cifra od skoro 4000 glasača koji su mi dali povjerenje kao i onih koji mi nisu dali podršku da još bolje, dinamičnije i uspješnije radimo u narednom periodu. Pred nama je još puno posla i puno pozitivnih priča i moj cilj je da realiziram što više projekata koji su u interesu građana ove lokalne zajednice. U toku su pripreme za nove infrastrukturne projekte gdje ćemo javnost u narednim danima i informisati. Posljednjih 19 mjeseci bili su mjeseci jednog posebnog dinamičnog i uspješnog rada. Naši građani su to i prepoznali i nisu nasjeli na bilo kakve druge nekorektno igre u predizbornim kampanjama i ja im se na tome iskreno zahvaljujem, jer su po ko zna koji put pokazali i dokazali da Bužim nije na prodaju. Željeli smo ovim pokazati da sam izabrani načelnik koji nastavlja raditi i graditi za dobrobiti nas i naše djece“, kazao je načelnik općine Bužim Mersudin Nanić.

Načelnik je istakao, kako je prethodnih 19 mjeseci bio načelnik svih građana i da tako želi nastaviti i u narednom periodu, te da će stajati na raspolaganju i zajedničkim snagama rješavati sve ono što bude izazov u budućnosti, jer mi pričamo djelima.



NAČELNIK OPĆINE BUŽIM MERSUDIN NANIĆ POTPISAO UGOVOR VRIJEDAN 60.000,00 KM ZA REKONSTRUKCIJU NP ABDIĆI-MUSIĆI



Danas je u Sarajevu općinski načelnik Mersudin Nanić u prisustvu direktora Ureda za koordinaciju projekta – PCU pri Federalnom ministarstvu poljoprivrede, vodoprivrede i šumarstva IFAD-a, Halila Omanovića, te izvođača radova direktor firme „Kov-Grad“, Safeta Kovačevića potpisao ugovor vrijedan oko 60.000,00 KM za

izgradnju nekategorisanog puta Abdići-Musići.

Dugogodišnji problem sa neadekvatnom putnom komunikacijom za mještane naselja Abdići-Musići današnjim potpisanim ugovorom ubrzo će biti riješen.

Naime, općina Bužim već dugi niz godina aplicira prema višim nivoima vlasti sa projektom izgradnje pomenutog putnog pravca, a nakon što je odobren projekat danas je u Sarajevu i svečano potpisan veoma važan ugovor o ustupanju radova na izgradnji nekategorisanog putnog pravca Abdići-Musići.

Važno je napomenuti da se na ovom dijelu puta nalazi i izvorište „Musići“ sa kojeg se veći dio općine Bužim napaja vodom.

„Nastavljamo sa realizacijom infrastrukturnih projekata koji su od značaja za sve naše građane. Ovaj je projekat čekao neko vrijeme na svoju završnicu i sretan sam što evo danas potpisujemo ugovor s kojim će radovi biti nastavljeni i nadam se, ubrzo uspješno i okončani na naše, ali prije svega zadovoljstvo mještana koji žive u pomenutim naseljima. Općina Bužim, zajedno sa građanima, te Vladom FBiH i Vladom USK-a ove godine uložiti će velika sredstva da skoro svako naselje ima asfaltni put,“ kazao je načelnik općine Bužim Mersudin Nanić.

PRIJEM ZA ČLANOVE TKD KLUBA FADIL BAJREKTAREVIĆ “GAZIJA” I MNK VRHOVSKA BUŽIM



Načelnik općine Bužim Mersudin Nanić upriličio je prijem za članove i upravu TKD kluba Fadil Bajrektarević “Gazija” Bužim i MNK kluba “Vrhovska” povodom nastupajućih turnira u sklopu manifestacije Dani općine Bužim 2020. Radi se o 4. Juniors Bosnia open turniru u Taekwondo-u i Malonogometnom dječijem turniru “Bužim kup” koji će biti održani 22. i 23. februara u Sportskoj dvorani Bužim.

S obzirom da se turniri održavaju u sklopu manifestacije “Dani općine Bužim 2020.” načelnik Mersudin Nanić naglasio je da se nada da će isti dobiti tradiciju kao što

je slučaj sa Malonogometnim turnirom “Izet Nanić” te je u vezi s tim pružio bezrezervnu podršku navedenim klubovima. Tako će općina Bužim biti generalni sponzor turnira.

Pozivamo sve ljubitelje sporta da dođu i svojim prisustvom podrže navedene sportske sadržaje.

NAČELNIK POSJETIO OŠ „MIRSAD SALKIĆ“ U ČAVI



Mersudin Nanić, načelnik općine Bužim, danas je posjetio Osnovnu školu "Mirsad Salkić", koja se nalazi u Čavi. Poznato vam je svima da je škola u Čavi prije nekoliko mjeseci pretrpjela velika oštećenja u požaru kojeg su uzrokovale neispravne instalacije.

Povod posjete su radovi na školi koji se izvode u punom kapacitetu. Na radost svih nas, a posebno djece i mještana Mjesne zajednice Čava već u ponedjeljak učenike i zaposlenike škole očekuju potpuno nove i čiste prostorije.

Načelnika i njegove saradnike je dočekaio i ugostio direktor škole, Zeid Suljadžić, a razgovarali su o radovima koji se izvode na školi, koju je požar oštetio toliko da je rad u njoj bio potpuno onemogućen.

Naglašavamo da je brzom reakcijom općinskog načelni-

ka koji je iz budžetske rezerve izdvojio 5.000,00 KM za kupovinu građevinskog materijala koji je bio prijeko potreban za privremenu zaštitu objekta, a gdje su mještani i zaposlenici ove obrazovne ustanove sami izvršili radove. Kasnije će se pokazati da su ovo značajna sredstva koja su sačuvala unutrašnjost objekta od daljeg propadanja.

Nedugo zatim općinski načelnik uputio je inicijativu Vladi FBiH za novčana sredstva u iznosu od 100.000,00 KM, gdje je Vlada prepoznala inicijativu kao prioritetnu i navedeni iznos odmah i odobrila za sanaciju škole. Također i Vladu USK-a obezbijedila je 70.000,00 KM gdje se još sredstva čekaju da budu operativna. Pored toga i građani su obezbijedili oko 13.000,00 KM za sanaciju škole.

„Želim se prije svega u ime svih građana Općine Bužim zahvaliti svima onima koji su na bilo koji način pomogli da naša škola ima potpuno nove uslove za rad. Isto tako zahvalio bi se i izvođačima radova koji posao rade sjajno. Samo zajedničkim snagama uspjeli smo da završimo čitav ovaj posao, koji uopšte nije bio lako, i da će naši đaci dobiti svoju školu koja će biti kao nova, sa potpuno uređenim prostorijama i novom opremom i u skladu sa svim standardima kako moderno obrazovanje traži i kako oni zaslužuju“ - rekao je načelnik Nanić.

Direktor OŠ „Mirsad Salkić“ Čava izrazio je zahvalnost načelniku općine na intenzivnoj saradnji u proteklih nekoliko mjeseci i uvjeren je da će tako biti i u narednom periodu.

NAČELNIK OPĆINE BUŽIM MERSUDIN NANIĆ DANAS JE BORAVIO U POSJETI PREDSEDNIKU STRANKE DEMOKRATSKE AKCIJE BAKIRU IZETBEGOVIĆU.

Izetbegović je čestitao na izbornoj pobjedi načelniku općine Bužim, kao i općinskoj organizaciji SDA Bužim, te istakao važnost angažmana mladih ljudi u politici poput Nanića. Načelnik Nanić je iskazao punu podršku predsjedniku Izetbegoviću u vođenju stranke i aktivnostima koje doprinose stabilizaciji države. Također, je pozvao predsjednika Izetbegovića da prisustvuje otvaranju Trga „Alija Izetbegović“, koji je planiran za 20. februara 2021. godine kada općina Bužim obilježava Dan općine.

Sastanku su, pored načelnika Nanića, prisustvovali potpredsjednik SDA Šemsudin Dedić, potpredsjednik Kantonalnog odbora SDA i član Glavnog odbora Safet Kovačević i predsjednik Općinske organizacije SDA Bužim Abid Mulalić.



DODIJELJENI CERTIFIKATI GLOBAL GAP ČLANOVIMA UDRUŽENJA “POVRTLAR” BUŽIM



je, obrazovne institucije ili pružaoce poslovnih razvojnih usluga, da predaju projektne prijedloge za implementaciju standarda za sigurnost i kvalitet hrane, odabrane su firme za pružanje konsultantskih usluga za implementaciju standarda sigurnosti i kvalitete hrane po pozivu. Udruženje poljoprivrednih proizvođača u zaštićenim prostorima “Povrtlar” Bužim, je također iskoristilo sredstva za konsultantske usluge za uvođenje standarda GLOBAL GAP opcija 2 za udruženje prema navedenom pozivu. Konsultantske usluge u okviru navedenog poziva je obavila firma MAHING doo Lukavac a konsultanti su bili prof.dr.sc. Halid Makić i prof. dr.sc. Husein Keran.



Usali općine Bužim danas su dodijeljeni Certificati GLOBAL GAP za članove udruženja “Povrtlar”, a certifikacijom je obuhvaćeno petnaest članova. Certifikaciju je izvršila Europsko inspeksijsko certifikacijsko tijelo iz Atene, Grčka. Naime, u okviru poziva RFP No. AID-168-C-16-00001/Sub-010-2018 USAID/Sweden FARMA II za domaće neprofitne, profitne i nevladine organizaci-

OPĆINSKI NAČELNIK POTPISAO UGOVOR O STIPENDIRANJU 72 STUDENTA OPĆINE BUŽIM

Danas je Općinski načelnik Mersudin Nanić u velikoj sali Centra za kulturu, sport i informisanje Bužim, upriličio potpisivanje ugovora o stipendiranju sa studentima koji su na konkursu Općine Bužim ostvarili pravo na stipendiju za akademsku 2019/20. godinu. Općina Bužim je ove godine dodijelila ukupno 72 stipendije u iznosu od 650,00 KM. Prije potpisivanja ugovora studentima i njihovim roditeljima obratili su se Sead Emrić, referent za kulturu u općini Bužim i načelnik općine Bužim Mersudin Nanić.



“Prije svega želim čestitati, vama i vašim roditeljima, jer danas ugovore o potpisuju samo redovni sudenti koji redovno završavaju svoje studije. Uvjeren sam da će mnogi od vas u skoroj budućnosti biti uzorni članovi naše zajednice, da će svoje stečeno znanje iskoristiti u razvoju Bužima, Unsko sankog kantona i Bosne i Hercegovine,” - istakao je načelnik općine Bužim Mersudin Nanić.

SVEČANO POTPISAN UGOVOR ZA REKONSTRUKCIJU RASKRSNICE NA TRGU „ALIJA IZETBEGOVIĆ“



Danas je za sve Bužimljane poseban dan iz dva razloga, prvi razlog je što obilježavaju 25-tu godišnjicu od osnivanja općine Bužim nizom prigodnih sadržaja, drugi razlog je taj što je danas svečano potpisan ugovor o realizaciji jednog od najvećih infrastrukturnih projekata u posljednjih deset godina. Naime, radi se o projektu izgradnje i rekonstrukcije saobraćajnice - kružnog toka, koji se naslanja na Trg „Alija Izetbegović“. Ugovor su potpisali Bekir Isaković, izvršni direktor za ekonomske i pravne poslove JP Ceste F BiH i Safet Kovačević, direktor firme Kov-Grad d.o.o. Bužim. Ovim radovima izgraditi će se kružni tok. Ukupna vrijednost potpisanog ugovora je oko 1,3 miliona konvertibilnih maraka, a

finansirat će se iz budžeta JP Ceste F BiH. Općina Bužim je inicirala izgradnju kružnog toka na pomenutoj lokaciji obzirom da se radi o samom centru općine i jedna je od frekventnijih lokacija na području općine. Podsjećanja radi idejno rješenje Trga „Alija Izetbegović“ uradio je počasni građanin općine Bužim gospodin Nedžad Branković. U svom obraćanju, općinski načelnik Mersudin Nanić istakao je kako je Bužim nakon izrade kompletne projektne dokumentacije za izgradnju kružnog toka, riješila imovinsko – pravne odnose, te dala svoje aktivno učešće u pripremanju potrebne dokumentacije zajedno sa predstavnicima JP Ceste F BiH. -Nakon kontinuiranog rada na pribavljanju potrebne dokumentacije, te osiguravanja potrebnih sredstava, danas su se stekli uslovi za početak izgradnje ovog velikog saobraćajnog projekta na području općine Bužim. Sigurna sam da će ovaj projekat imati razvojni karakter i pokrenuti niz novih investicija, istakao je načelnik Nanić. Izvođač radova je preduzeće „Kov-grad“, koji ima rok od 150 dana da izgradi raskrsnicu. Iz ovog preduzeća su obećali da će nastojati da radove okončaju i prije ugovorenog roka. Tehnički direktor JP Ceste F BiH Bekir Isaković naglasio je da je ovo samo jedan od projekata koje ovo preduzeće realizuje sa općinom Bužim, te naveo da je planiran nastavak izgradnje dijela magistralne ceste koja prolazi kroz središte općine Bužim a čija se izgradnja čeka 20 godina. Kazao je da se planira izvršiti promjena izgleda raskrsnice na ulazu u Bužim iz pravca Velike Kladaše sa raskrsnicom kružnog toka koje su danas moderno saobraćajno rješenje. Istakao je da JP Ceste F BiH na cijeloj trasi planira izvođenje radova na spajanju druge transverzale pristupnih cesta za Lubardu i Kupusnicu, te mostova koji spajaju magistralne ceste kroz samu općinu sa lokalnim putevima i ulicama. Na kraju načelnik Nanić najavio je i drugi kapitalni projekt, a to je izgradnja Trga „Alija Izetbegović“, koji će pored ovog projekta dodatno krasiti bužimsku čaršiju.



NANIĆ U DDBIH: OPĆINA BUŽIM ZA SVOJ OPSTANAK JE UDARILA JAKE TEMELJE



Bosanska Krajina, uvijek naš ponos, uvijek stamena i čvrsta, ali uvijek na udaru. Često se čini kako je kraji-
na zaboravljena ili na samom kraju liste prioriteta.

Ipak, taj dio naše zemlje, bez sumnje jedan je od najljepših, najčistijih, historijski i kulturno najbogatijih – ta-
mošnji gradovi sve biser do bisera. Bužim, jedan od njih nedavno proslavio svoju važnu godišnjicu, a o tome
i životu u Bužimu razgovarali smo u emisiji „Dobar dan BiH“ s načelnikom općine Mersudinom Nanićem.

20. februara ove godine navršilo se 25 godina otkako je ratno predsjedništvo Republike Bosne i Hercegovine
na čelu s Alijom Izetbegovićem donijelo odluku o ponovnom osnivanju općine Bužim. Šta Bužimljanima
znači vraćanje statusa koje joj je u prošlosti oduzeto?

Znači puno s obzirom da je ovo najmlađa općina u Federaciji i da imamo najmlađeg načelnika. Nadamo se
da su dobri temelji udareni kako bi opstala Općina Bužim. Kao što znate Bužim je u proteklom ratu dao na-
jveći broj šehida, koji su se borili za opstojnost naše zemlje, i sigurno je to bio dobar razlog da se vrati status
Općine.

Kako se u ovih 25 godina razvijao Bužim? Na koje ste projekte posebno bili fokusirani otkako ste na poziciji
– jesu li možda bili povezani s pitanjima i problemima mladih ljudi?

Da bi pričali o budućnosti ne smijemo zaboraviti svoju historiju, i one koji su sve dali za Bužim ali i zemlju.
Sve to se prenosi na mlađe generacije, i sjećanje ostaje. Pokušavamo da naše generacije upoznajemo s is-
tinom, i trebaju znati da smo ostvarili i pobjedu.

Jedan od problema s kojima se građani viteškog grada suočavaju jesu redukcije vode, razlog su ako se ne
varamo neplaćeni računi za električnu energiju koje mjesecima nije plaćalo komunalno preduzeće. Kako to
komentarišete i koliko je ozbiljan ovaj problem Bužima?

Jedan je to od gorućih problema, jer su to energeti bez kojih ne možemo da živimo. Taj problem je eskalirao
jer preduzeće nije izmirilo obaveze za električnu energiju. Planirali smo da budžetom izmirimo ta sredstva.
Još jedan veliki problem za državu, ali unsko-sanski kanton najviše – migrantska kiza. Kakva je situacija u
Bužimu i ima li straha pred novim valom koji je krenuo prema našoj zemlji? Ima li Bužim uopće smještajne
kapacitete za migrante?

Kada je u pitanju migrantska kriza mi smo ruta, i po toj logici ne bi trebali da se zadržavaju. Ipak u hladnijim
danima ih je bilo, no međutim uz asistenciju policije i Komunalnog poduzeća ih očistili i premjestili iz Buži-
ma. Naravno val koji se najavljuje trebao bi opet proći kroz Bužim, ali mi nemamo kapacitet za migrantski
centar, i nadamo se da do toga neće doći.

ODRŽAN RADNI SASTANAK OPĆINSKOG NAČELNIKA I DIREKTORA FONDA



Danas je u Kabinetu općinskog načelnika održan radni sastanak, Općinskog načelnika Mersudina Nanića i novoizabranog direktora JU Kantonalni fond za pomoć u stambenom zbrinjavanju i zapošljavanju boračkih populacija Suvada Šahinovića, sa saradnicima.

Na sastanku su razmatrana pitanja iz domena boračko-invalidske zaštite i načina kako pomoći ugroženim borcima na području općine Bužim u djelu koji se može finansirati iz budžeta općine Bužim i Fonda za stambeno zbrinjavanje boračkih populacija USK-a.

Općina Bužim i Fond za stambeno zbrinjavan-

je USK-a u narednom će periodu, a u suradnji sa Koordinacijom boračkih udruženja, nastaviti pozitivnu suradnju u nastojanju da se kroz razne vidove pomoći pomogne najugroženijim boračkim populacijama, što će definisati svojim programima.

Zajednički stav nakon održanog sastanka je da samo zajedničkim radom svih nas možemo postići cilj zbog kojeg institucije i postoje, a to je da u ovom teškom periodu koje je zahvatilo sve nas, olakšamo našim građanima njihove životne potrebe i omogućiti-



OPĆINSKI NAČELNIK ODRŽAO SASTANAK SA KOORDINACIJOM BORAČKIH UDRUŽENJA OPĆINE BUŽIM



Općinski načelnik Mersudin Nanić održao je sastanak sa Koordinacijom boračkih udruženja općine Bužim, na kojem je razgovarano o aktivnostima i planovima boračkih udruženja u narednom periodu, te o trenutnim problemima oko finansiranja rada udruženja koji su nastali zbog posljedica izazvanih korona virusom. U toku sastanka predstavnici boračkih udruženja zahvalili su se Općinskom načelniku na suradnji koju imaju sa općinom Bužim, te istakli da razumiju stanje u kojem smo se svi našli zbog globalne pandemije i manjka punjenja budžeta općine Bužim.

Na kraju sastanka zaključeno je da će općina i

Koordinacija boračkih udruženja nastaviti zajednički pratiti sve aktivnosti oko obilježavanja značajnih datuma na području općine Bužim, ali i pružati pomoć svima onima zbog kojih su udruženja i osnovana, kao što je to i do sada bilo, uz praćenje punjenja budžeta općine.

MUFTIJA KUDIĆ POSJETIO OPĆINU BUŽIM I NAČELNIKA MERSUDINA NANIĆA



Muftija bihački hafiz Mehmed-ef. Kudić posjetio je općinu Bužim i susreo se sa načelnikom Mersudinom Nanićem.

Muftija se ovom posjetom želio zahvaliti načelniku Naniću za njegovu posjetu muftiji Kudiću odmah nakon njegovog imenovanja i za podršku koju je općina Bužim u proteklom periodu pružila za realizaciju projekata koje je realizovala Islamska zajednica.

„U Bužimu se uvijek lijepo osjećam. Bužim je viteški grad koji je simbol časne i herojske odbrane naše domovine, a kada je u pitanju vjerski život po tome je Bužim jedinstven. Kada je u pitanju saradnja Islamske zajednice sa općinom Bužimom,

sporazum kojeg je potpisala Općina Bužim sa Medžlisom IZ Bužim 2013. godine je vrlo dobar primjer dobre saradnje institucija i za druge općine. Nadam se da će i u budućnosti ti odnosi biti građeni na kvalitetnoj partnerskoj osnovi i međusobnom uvažavanju, poštovanju i potpomaganju.“ – istakao je muftija Kudić.

Načelnik općine Bužim Mersudin Nanić je zahvalio muftiji Kudiću i izrazio toplu dobrodošlicu njemu i njegovim saradnicima, kao i glavnom imam Medžlisa IZ Bužim Mehmed-ef. Harčeviću i predsjedniku izvršnog odbora Medžlisa IZ Bužim Eniz-ef. Veladžiću. Načelnik je prije svega informisao muftiju o opštem stanju u općini Bužim u toku i nakon pandemije, te najavio skorou posjetu Medžlisu IZ Bužim.

„Zahvalni smo dragom Bogu da smo uspješno prevazišli izazove s kojima smo se suočili usljed pojave pandemije koronavirusa. Nismo imali niti jednog zaraženog. (Jedna osoba koja je zaražena i koja se vodi da je iz Bužima ustvari je samo prijavljena u Bužimu, ali je nastanjena u Bihacu op. autora). Radili smo intenzivno da ugroženim građanima dostavimo adekvatnu pomoć, a zahvalan sam i našim privrednicima koji nisu otpuštali radnike. Kada je u pitanju saradnja sa Medžlisom IZ Bužim, tradicionalno su odnosi dobri i pogotovo je značajan doprinos Medžlisa IZ Bužim u obilježavanju važnih datuma za Bužim i Bosnu i Hercegovinu, a saradnja će biti svakim danom kvalitetnija i bolja, što je interes i Općine Bužim i Medžlisa IZ Bužim i svih naših građana i džematlija.“ – istakao je načelnik Nanić.



Kroz razgovor je tematizirana i organizacija jedne od najbolje organiziranih manifestacija u našoj domovini „Slobodarski dani viteškog grada Bužima“, a u kojoj pored općine Bužim i boračkih udruženja najveću ulogu uzima upravo Medžlis IZ Bužim. Iskazana je želja i proučena dova da se i u miru organiziramo i uradimo sve da se ciljevi zbog kojih su heroji dali svoje živote i ostvare.

PRIJEM MEDŽLISA ZA DELEGACIJU OPĆINE BUŽIM



U prostorijama Islamskog kulturnog centra Bužim, u ime Medžlisa Islamske zajednice Bužim upriličen je prijem za načelnika općine Bužim Mersudina Nanića i njegove saradnike. Prijem i radni sastanak upriličio je Eniz ef. Veladžić, predsjednik Medžlisa IZ Bužim zajedno sa glavnim imamom Mehmed ef. Harčevićem. Riječ je o prijemu koji se već tradicionalno organizuje u duhu što bolje saradnje ovih dviju institucija. Podsjećanja radi prije nekoliko dana delegacija Medžlisa zajedno sa muftijom bihačkim hafizom Mehmed ef. Kudićem je boravila u službenoj posjeti općini Bužim. Nakon izražavanja dobrodošlice od strane predsjednika Medžlisa i glavnog imama razgovarano je od-

nosima Medžlisa i općine Bužim koji su tradicionalno dobri i nikad nisu niti smiju biti narušeni bez obzira na određene razlike i mišljenja, naglašeno je. Razgovarano je i o podršci općine Medžlisu, kao i o budućim projektima Medžlisa Bužim. Podrška bi trebala biti neupitna posebno uzimajući u obzir da je struktura stanovništva općine Bužim gotovo u potpunosti kroz vjerski život naslonjena na Islamsku zajednicu kroz džemate i Medžlis, istakli su na prijemu. Takođe je bilo govora i o doprinosu Medžlisa IZ Bužim u obilježavanju važnih datuma za Bužim i Bosnu i Hercegovinu te nadolazećoj manifestaciji "Slobodarski dani viteškog grada Bužima".

POSJETA MEMORIJALNOM CENTRU POTOČARI-SREBRENICA



Delegacija Općine Bužim, predvođena načelnikom Mersudinom Nanićem, danas je boravila u posjeti Memorijalnom centru Potočari-Srebrenica, gdje su položili cvijeće na spomen-obilježju, te učenjem Fatihe odali počast svim žrtvama genocida počinjenog u julu 1995. godine.

Nakon polaganja cvijeća, delegacija Općine Bužim posjetili su Spomen-sobu koja se nalazi u bivšoj fabrici akumulatora i prisustvovali projekciji dokumentarnog filma o stradanju Bošnjaka u Srebrenici 1995. godine. Također načelnik Nanić susreo se sa

Alijom Tabakovićem zajedničkim kandidatom za načelnika Općine Srebrenica ispred probosanskih političkih stranaka u Srebrenici, što znači da će Bošnjaci u Srebrenici jedinstveno izaći na izbore. Prilikom današnje posjete načelnik Nanić sastao se i sa predsjedavajućim Predstavničkog doma Parlamentarne skupštine Bosne i Hercegovine dr. Denisom Zvizdićem, gdje su razgovarali o budućoj saradnji i posjeti Općini Bužim od strane dr. Zvizdića. „Na svijetu ne bi trebao da postoji Bošnjak koji nije posjetio Memorijalni centar Srebrenica-Potočari, jer kada dođete ovdje i vidite, samo je dio onoga šta su ljudi ovdje doživjeli. Naša obaveza je da dolazimo i kada nije 11. juli, da posjetimo ovo mjesto i prenesemo poruke da se nikome nikad ne ponovi Srebrenica. Svi ovi ljudi koji žive na području Općine Srebrenica ne zaslužuju da budu sami, oni trebaju sve nas. Stoga moramo nastaviti svi zajedno da se borimo za bolji život svih Bošnjaka, pogotovo onih koji žive u Srebrenici, a to možemo postići samo ako u ovom teškom vaktu bude-
mo gradili međusobno povjerenje, uvažavanje, te zajedničkim jedinstvom, radom i poštenjem. Samo na taj način možemo nastaviti borbu za državu BiH i sve Bošnjake koji žive u ovom kraju naše jedine domovine“, kazao je načelnik Općine Bužim Mersudin Nanić.



PRIJEM ZA RATNE STARJEŠINE 505.VITEŠKE BRIGADE



Općinski načelnik Mersudin Nanić, a u okviru dvadeset i pete manifestacije “Slobodarski dani viteškog grada Bužima”, upriličio je svečani prijem za ratne starješine 505.Viteške brigade. Načelnik općine Bužim Merudin Nanić prvo se zahvalio starješinama brigade što su odvojili svoje vrijeme da bi prisustvovali ovom prijemu te posebno naglasio: “Slobodarski dani su prilika da se zajedno okupimo i obilježimo značajne datume, a ja prije svega želim uputiti iskrene zahvale starješinama brigade, porodicama poginulih boraca, ratnim vojnim invalidima i demobilisanim borcima za

sve ono što ste uradili u odbrani države Bosne i Hercegovine ali i u stvaranju čvrstih temelja općine Bužim. Zahvaljujući vašoj borbi imamo državu i općinu i sada moramo zajedničkim snagama i jedinstveno izgrađivati državu i našu lokalnu zajednicu, te stvarati bolje uslove za život svakog stanovnika. Slobodarski dani su posebno važni za sve naše bužimljanke i bužimljane kada između tuge zbog pogibije komandanta Izeta Nanića sa ponosom obilježavaju godišnjicu formiranja brigade. I u ovim specifičnim uslovima organizacija Slobodarskih dana nije dovedena u pitanje i ja se nadam da će se 15.08. završnom manifestacijom sve dobro i završiti”. Predsjednik Organizacionog odbora za obilježavanje značajnih datuma iz proteklog rata i ratni starješina brigade Edham Eminić govorio je o ovogodišnjoj organizaciji “Slobodarskih dana viteškog grada Bužima” i pripremama za završnu svečanost koja će se održati 15.08.2020.godine (subota) sa početkom od 17,00 sati. Posebno je naglasio kako je Bužim ove godine domaćin za 18. VITEŠKI brigada Armije R BiH i članovima porodica NARODNIH HEROJA. Prisutnima se obratio i ratni komandant 505.Viteške brigade Sead Jusić koji se zahvalio načelniku na organizaciji prijema za ratne starješine 505.Viteške brigade i prilici da se u ovim posebnim danima vide i druže.

MINISTAR SIGURNOSTI BIH SELMO CIKOTIĆ POSJETIO BUŽIM

Ministar sigurnosti Bosne i Hercegovine Selmo Cikotić boravi u dvodnevnoj posjeti Unsko-sanskom kantonu (USK), dijelu Bosne i Hercegovine najviše pogođenim migrantskom krizom.

Nakon što je juče boravio u Bihaću gdje se sastao sa Premijerom USK-a i gradonačelnikom Bihaća, zatim danas sa vlastima u Velikoj Kladaši a sve u vezi iznalaska rješenja migrantske krize, Ministar sigurnosti BiH Selmo Cikotić danas je posjetio i Bužim.

Na turbetu generala Izeta Nanića i šehida 505. viteške brigade dočekao ga je načelnik općine Bužim Mersudin Nanić sa saradnicima, te su zajedno položili cvijeće i proučili fatihu generalu Izetu Naniću i šehidima 505. viteške brigade.

U kratkom razgovoru bilo je govora i o Bužimu kao tranzitnoj ruti migranata, te je izražena volja da se problem sa istima u skorije vrijeme dovede u red.



ODRŽAN SASTANAK I DRUŽENJE U CILJU OSNIVANJA KROVNOG UDRUŽENJA FRIZERA I KOZMETIČARA USK



U Bužimu su se okupili vlasnici frizerskih radnji i kozmetičkih salona iz USK, s ciljem sagledavanja mogućnosti osnivanja krovnog kantonalnog udruženja. Iako je i ranije bilo sličnih pokušaja, ideja nikad nije realizovana. Pandemija koronavirusa čvršće je povezala frizere i dodatno učvrstila namjeru osnivanja asocijacije, koja je sinoć i dogovorena, a sve u cilju lakšeg rješavanja problema sa kojima se susreću. Kako je tokom ovog skupa kazano zatvaranje njihovih radnji na nekoliko mjeseci dovelo je u pitanje egzistenciju kako vlasnika tako i uposlenika.

Danas je situacija u mnogim elementima i teža, s obzirom na ekonomske parametre koji su izostali po nastavku rada. Zato, kako smatraju, potrebno je krovno udruženje putem

kojeg će moći institucionalno djelovati u pogledu borbe za bolji status i opstanak u veoma složenim okolnostima koje je proizvela pandemija koronavirusa.

Podršku ovoj ideji dala je i općina Bužim na čelu sa načelnikom Mersudinom Nanićem koji je u svom obraćanju naglasio bitnost opstanka malih i srednjih obrta u ovoj teškoj situaciji, te se u tom smislu u skladu sa mogućnostima stavio na raspolaganje.

PREDSTAVNIKE CRVENOG KRIŽA PRIMIO NAČELNIK OPĆINE BUŽIM



Načelnik općine Bužim Mersudin Nanić primio je u svom kabinetu predstavnik Općinske organizacije Crvenog križa gdje se razgovaralo o aktivnostima i projektima ove organizacije koja svake godine bilježi sve značajnije rezultate u svom radu.

„Prije svega želim se zahvaliti svim građanima Općine Bužim koji daruju svoju krv i redovno učestvuju u svim akcijama darivanja krvi koja je zasigurno spasila na desetine života naših građana. Posebna zahvala ide rukovodstvu Crvenog križa općine Bužim i darivaocima koji su dobili zaslužena priznanja za darovanu krv pedeset i stotinu puta. Vjerujem da će Crveni križ općine Bužim nastaviti sa svojim redovnim aktivnosti-

ma i organizacijom akcija darivanja krvi, a od općine Bužim će imati svu potrebnu podršku i finansijsku pomoć u prvođenju planiranih projekata“ istakao je načelnik općine Bužim Mersudin Nanić.

Zlatnu plaketu za više od stotinu darivanja krvi od Federalnog saveza Crvenog križa dobio je Fikret Abazović, dok su Dedić Rukija, Suljić Alaga i Senad Jusić nosioci plakete za 50 dobrovoljnih darivanja krvi.



PRIJEM ZA NAGRAĐENE ČLANOVE UDRUŽENJA PČELARA „PROPOLIS“ IZ BUŽIMA



Pčelari iz Bužima na međunarodnom sajmu meda u Tuzli osvojili su četiri zlatne i dvije srebrene medalje za kvalitet meda. Tim povodom Općinski načelnik Mersudin Nanić primio je članove Udruženja pčelara „Propolis“, te im čestitao na postignutom uspjehu i predstavljajući općine Bužim na ovom međunarodnom sajmu meda.

Obzirom da je i ova, kao i prošla godina, bila veoma teška i zahtjevana za sve proizvođače meda, ovogodišnji susret pčelara u Tuzli, a prema ocjenjivačkom žiriju, bio je veoma uspješan za bužimske pčelare.

Prema riječima predsjednika Udruženja pčelara „Propolis“ Šefketa Isakovića radi se o dobro organiziranom sajmu i takmičenju u pogledu kvaliteta meda na kojem su pčelari iz Bužima, ali i iz cijelog Unsko-sanskog kantona potvrdili uloženi trud i težak rad koji iziskuje pčelarstvo.

Načelnik općine Bužim Mersudin Nanić je pored čestitki za ostvarene rezultate na sajmu meda u Tuzli, obećao još bolju podršku članovima Udruženja pčelara u provođenju i realizaciji svih planiranih projekata.

Razgovoralo se i u neusvojenom Programu podrške poljoprivrednim proizvođačima općine Bužim za 2020. godinu i razlozima njegovog ne usvajanja od strane OV Bužim i pored brojnih urgencija i razgovora.

Dobitnici zlatnih medalja za kvalitet meda su Baltić Huse, Porić Nermin, Isaković Šefket i Ćazim Burzić




PREDSTAVNICI UDRUŽENJA PENZIONERA KOD NAČELNIKA OPĆINE



njihove brojne projekte koje realiziraju. Općinski načelnik Mersudin Nanić se zahvalio penzionerima na njihovoj posjeti i posebno naglasio da cijeni sve ono što rade za svoje članove, te će i u budućnosti imati podršku za sve svoje projekte i planirane aktivnosti.

Predstavnik Udruženja penzionera općine Bužim primio je načelnik općine Mersudin Nanić u svom kabinetu. Predstavnik penzionera upoznao je načelnika o radu i rezultatima ovog udruženja u proteklom periodu kao i planiranim aktivnostima, te zbog činjenice da već nekoliko godina nisu zastupljeni u općinskom budžetu, tražili od načelnika podršku za



UPRILIČEN PRIJEM ZA ŠAHOVSKU SEKCIJU SSRI POVODOM OSVAJANJA 2. MJESTA NA DRŽAVNOM PRVENSTVU



U sali općine Bužim danas je upriličen prijem za članove Šahovske sekcije SSRI Bužim, povodom njihovog odlučnog rezultata na Državnom prvenstvu u šahu za invalidna lica. Ova ekipa na prvenstvu je ostvarila izvanredne rezultate osvojivši ekipno drugo mjesto i dva pojedinačna prva mjesta. U pojedinačnoj kategoriji, prva mjesta na trećoj i četvrtoj tabli pripala su Samiru Đuliću i Nijazu Remetiću iz ekipe Bužim. Prijem je organizirao načelnik općine Bužim Mersudin Nanić, naglasivši da je podrška za ovakve rezultate uvijek bila neupitna. Razgovarano je i o ukupnoj dosadašnjoj kao i budućoj saradnji sa općinom Bužim, te su u vezi s tim članovima ove sekcije izrazili zahvalnost načelniku općine.

NAČELNIK NANIĆ IZLOBIRAO NOVIH 1.182.600,00 KM ZA PROLJETNE RADOVE NA BUŽIMSKOJ ZAIBILAZNICI



Nakon proglašenja magistralne ceste u općini Bužim značajne snage usmjerene su na projekat izgradnje naše obilaznice. U protekloj godini radilo se na pripremi rješavanja imovinsko-pravnih odnosa na kompletnoj dionici obilaznice na potezu Osnovna škola Bužim – Auto-Kontakt. Prema zacrtanom cilju vođeni vizijom, znanjem i iskustvom uposlenika organa uprave i ovaj složen posao je završen u rekordnom roku te je vlasnicima zemljišta isplaćeno preko milion KM od strane JP Ceste Federacije BiH. Naime, zahvaljujući lobiranju općinskog načelnika Mersudina Nanića i kadrova SDA na višim nivoima, dugo očekivana obilaznica na proljeće bi trebala otpočeti s radovima. Ova informacija potvrđena je i Cestama Federacije BiH koje su rebalansom budžeta planirale izdvajanja u iznosu od 1.182.600,00 KM za nastavak izgradnje obilaznice u Bužimu. "Vjerujem da će ova vijest sigurno obradovati sve naše Bužimljane. Pored završetka dva infrastrukturna projekta u našoj čaršiji nastaviti ćemo s ravnomjernim ulaganjem i u ostale mjesne zajednice. U narednom periodu puno je još posla pred nama, kao što je rješavanje vodosnabdijevanje svih građana sa pitkom vodom, te ulaganjem u turizam, javna preduzeća i javne ustanove, kulturu, sport, obra-

zovanje i nevladin sektor, privredu i poljoprivredu, boračko-invalidsku i socijalnu zaštitu, mlade i penzionere. Ovo su samo neki od pobrojanih projekata koje ćemo uz vašu podršku realizirati, jer samo sa jakom SDA, jak je i naš Bužim i naša BiH", kazao je načelnik općine Bužim Mersudin Nanić. Kako smo i ranije pisali ukoliko Bužimljani 15. novembra izaberu isti ovaj tim na čelu Općine Bužim možemo biti sigurni da će ovaj projekat biti uspješno završen na zadovoljstvo svih naših sugrađana. Pišemo pozitivne priče, radimo i pričamo djelima! U prilogu pogledajte video isječak kako će Bužimska obilaznica u konačnici izgledati. 3D animaciju uradila je firma Saraj inženjering d.o.o Sarajevo, čiji vlasnik je počasni građanin općine Bužim Nedžad Branković. Podsjećanja radi, idejna rješenja i glavni projekat za trg i kružni tog uradila je pomenuta firma, na čemu im se ovom prilikom najiskrenije zahvaljujemo. "Budimo dio pobjedničkog tima koji će 15. novembra slaviti pobjedu za načelnika i vijećnička mjesta u Općinskom vijeću", poručio je u Mersudin Nanić sugrađanima u povodu lokalnih izbora koji će biti održani u nedjelju, 15. novembra.

PREDSJEDNIK BZK PREPOROD PROF. DR. SANJIN KODRIĆ U POSJETI OPĆINI BUŽIM



Načelnik općine Bužim Mersudin Nanić juče je bio domaćin prijema za predstavnike Bošnjacke zajednice kulture "Preporod" iz Sarajeva na čelu sa njenim predsjednikom prof. dr. Sanjinom Kodrićem.

Prijemu su prisustvovali i članovi BZK "Preporod" Bužim sa predsjednikom Amirom Sijamhodžićem, općinski vijećnici te saradnici općinskog načelnika.

Načelnik Mersudin Nanić izrazio je dobrodošlicu gostima iz Sarajeva te obećao da će saradnja općine Bužim i BZK Preporod biti unaprijeđena, dotičući se dosadašnje saradnje i velike uloge BZK Preporod Bužim u unaprijeđenju kulturnog života općine Bužim.

Predsjednik BZK "Preporod" prof. dr. Sanjin Kodrić podsjetio je na značaj, historijsku ulogu i status "Preporoda" kao temeljne kulturne ustanove Bošnjaka, naglasivši da i lokalne zajednice i društvo u cjelini trebaju prepoznati i adekvatno valorizirati značaj "Preporoda" i doprinijeti njegovom pozicioniranju u društvu. A članovi, Direkcija i podružnice "Preporoda" kroz sve svoje programske sadržaje i aktivnosti moraju uvijek iznova pokazivati svoju konstruktivnost i davati doprinos izgradnji društva i države Bosne i Hercegovine.

Predsjednik BZK „Preporod“ Bužim Amir Sijamhodžić kazao je da Preporod i Općina Bužim već godinama ostvaruju dobru saradnju, koja se ogleda u brojnim uspješno realiziranim projektima od najšireg značaja. Također je naglasio da je Preporod svih proteklih godina bio a to će i u buduće ostati mjesto okupljanja svih kulturnih radnika, umjetnika i općenito zaljubljenika u kulturu, bez obzira na sve njihove razlike, te da će ostati homegnizirajući faktor svih Bošnjaka bužimskog kraja. Sve to nas dodatno obavezuje da se ta saradnja i dalje stalno poboljšava i unaprijeđuje, završio je Sijamhodžić.

Naglašeno je i da će općina Bužim pokrenuti inicijativu za donošenje Odluke o proglašenju BZK Preporod društvom od posebnog značaja.



PODRŠKA OPĆINE BUŽIM NAUČNOM SKUPU

Načelnik općine Bužim Mersudin Nanić ugostio je u svom kabinetu delegaciju Muftijstva bihačkog, Harisa ef. Veladžića rukovodioca službe za vjerske poslove i obrazovanje i mr. Suada ef. Mahmutovića koordinatora naučnog skupa "Život i djelo reisa Džemaludina Čauševića".

Riječ je o naučnom skupu koji će biti organizovan 17. decembra u povodu 150 godina od rođenja reisa Čauševića, a na kojem će svoja izlaganja imati eminentni profesori sa nekoliko bosansko-hercegovačkih univerziteta.

Načelnik općine Bužim dao je podršku ovom vrijednom i posebno za krajiške muslimane bitnom projektu, te se zahvalio delegaciji Muftijstva bihačkog na posjeti općini Bužim.



NAČELNIK RAZGOVARAO SA PREDSTAVNICIMA UDRUŽENJA SLIJEPIH I SLABOVIDNIH



Načelnik općine Bužim Mersudin Nanić primio je u svom kabinetu predstavnike Udruženja slijepih i slabovidnih osoba općine Bužim. Predsjednik udruženja Nijaz Veladžić-Veljun predstavio je plan i program Udruženja za narednu godinu, te upoznao načelnika općine sa dosadašnjim aktivnostima ovog udruženja i brojnim realiziranim projektima pomoći članstvu ove veoma osjetljive kategorije društva.

Načelnik općine Mersudin Nanić izrazio je svoju podršku aktivnostima Udruženja, te posebno naglasio: "Općina Bužim i ja kao općinski načelnik podržavamo rad Udruženja građana koja provode svoje aktivnosti na području naše općine, provode projekte i organiziraju različite događaje. Udruženje slijepih i slabovidnih osoba sa svojim članovima je posebno osjetljiva kategorija našeg društva i zasigurno će imati svu potrebnu podršku općine Bužim. Posebno me raduje činjenica da ste aktivni članovi lokalne zajednice u kojoj tražite svoje mjesto i aktivno učestvujete u svim procesima ali isto tako postajete vidljivi u svojoj lokalnoj zajednici koja će to morati prepoznati".

Udruženje slijepih i slabovidnih osoba sa svojim članovima je posebno osjetljiva kategorija našeg društva i zasigurno će imati svu potrebnu podršku općine Bužim. Posebno me raduje činjenica da ste aktivni članovi lokalne zajednice u kojoj tražite svoje mjesto i aktivno učestvujete u svim procesima ali isto tako postajete vidljivi u svojoj lokalnoj zajednici koja će to morati prepoznati".

NAČELNIK OPĆINE BUŽIM U OBILASKU OŠTEĆENIH OBJEKATA

Nakon zemljotresa sa epicentrom u okolici Petrinje (R Hrvatska) i na području općine Bužim registrirana su brojna oštećenja na stambenim privatnim i društvenim objektima, a posebno u rubnim dijelovima općine koja graniče sa R Hrvatskom. Tim povodom načelnik općine Bužim Mersudin Nanić sa saradnicima obišao je prvo Osnovnu školu "Bužim" gdje je razgovarao sa direktorom Adnanom Nuhićem o stanju objekata centranlne i područnih škola. Manja oštećenja zidova zabilježena su u područnoj školi u Zaradostovu, a najugroženiji je objekat stare škole koja se već duže vrijeme ne koristi za odvijanje nastave. Načelnik je razgovarao sa sekretarom i v.d. direktoricom Dječijeg vrtića Bužim Rejhanom Velić koji je smješten u područnoj školi Zaradostovo i prostorijama mjesne zajednice. Najveću štetu pretrpio je objekat područne osnovne škole Radoč, a načelnik općine je sa direktorom Osnovne škole "Mirsad Salkić" Zeidom Suljadžićem posjetio ovu školu koja je danas zatvorena za odvijanje nastave. "Ozbiljno je oštećen stari objekat škole na Radoču koja će zasigurno trebati hitnu sanaciju jer je došlo do oštećenja konstrukcije krovista i nosivih zidova. Komisija općine Bužim za procjenu šteta od prirodnih i drugih nesreća će već sutra biti na terenu gdje će na licu mjesta popisati nastale štete. Koristim ovu priliku da pozovem sve naše građane koji su pretrpili štetu od zemljotresa da istu prijave kako bi imali kompletnu sliku svih oštećenih objekata i kako bi mogli poduzimati druge zakonom propisane radnje". - istakao je načelnik općine Bužim Mersudin Nanić nakon obilaska oštećenih objekata.



PROJEKAT KOJI SE ČEKAO GODINAMA: POTPISAN UGOVOR O IZGRDANJI TRGA „ALIJA IZETBEGOVIĆ“ U BUŽIMU



mentaciji značajnih projekata, a to su zasigurno izgradnja Trga, odnosno kružnog toka koji je sastavni dio našeg trga. Izgradnjom ova dva infrastrukturna projekta Općina Bužim će dobiti sasvim novi izgled, koji će svakako postati prepoznatljivo obilježje. Trg koji nosi naziv prvog predsjednika Predsjedništva Republike Bosne i Hercegovine Alije Izetbegovića bit će mjesto za okupljanje i druženje svih Bužimljana i svi onih koji dolaze u naš Bužim, dok će izgradnja kružnog toka doprinijeti povećanoj sigurnosti u saobraćaju s obzirom da bi trebao značajno smanjiti gužve u samom centru naše čaršije. Na kraju želio bih da se posebno zahvalim članu predsjedništva BiH gospodinu Šefiku Džaferoviću koji je prepoznao važnost ovog infrastrukturnog projekta u Općini Bužim, kao i ministrima Ramiću i Dediću koji su podržali navedeni projekat“, kazao je načelnik Općine Bužim Mersudin Nanić.



Općinski načelnik Mersudin Nanić, Federalni ministar raseljenih osoba i izbjeglica Edin Ramić i direktor firme KOV-GRAD doo Bužim, potpisali su u prostorijama Ministarstva ugovor o realizaciji jednog od najznačajnijih infrastrukturnih projekata na području Općine Bužim. Naime, radi se o projektu izgradnje Trga „Alija Izetbegović“, koji podrazumijeva potpunu izgradnju istog. Vrijednost potpisanog ugovora iznosi 330.000,00 KM, a Općina Bužim će učestvovati u finansiranju ovog projekta sa 50.000,00 KM.

Dakle riječ je o dva zasebna projekta u ukupnoj vrijednosti od oko 1,7 miliona KM.

„Na području naše Općine vodimo aktivnosti na imple-



PRI KRAJU EKSPROPRIJACIJA ZEMLJIŠTA ZA GRADNJU OBILAZNICE U BUŽIMU: DO SADA ISPLAĆENO PREKO 650.000,00 KM GRAĐANIMA ZA ZEMLJIŠTE

U interesu blagovremenog i istinitog informisanja građana općine Bužim i šire javnosti, a vezano za implementaciju projekta izgradnje dijela magistralne ceste koja prolazi kroz središte općine Bužim, a poznatija u narodu kao „Obilaznica Bužim“, sa zadovoljstvom ističemo da se pomenuti projekat implementira prema dogovorenoj dinamici i planu, kako je i definisano planom rada i prema dogovorima Vlade Federacije BiH, JP Ceste Federacije BiH i općine Bužim. Krajem 2019. godine javnost smo informisali da je započet postupak rješavanja imovinsko-pravnih odnosa, odnosno eksproprijacija zemljišta potrebnog za izgradnju saobraćajnice – Obilaznice u Bužimu.



U skladu sa rokovima i propisima, organ uprave u saradnji sa JP Ceste Federacije BiH, paralelno rješava i pitanja zaključenja sporazuma o isplati nakanda za eksproprijirano zemljište, a prema dokumentaciji već je izvršena isplata u visini od 650.000,00 KM, što procentualno čini oko 50% isplate od potrebnog iznosa.

U narednom periodu, a prema planu rada, do kraja mjeseca februara planirano je zaključenje sporazuma za ostatak eksproprijiranih nekretnina, a što znači da će i isplata sredstava biti izvršena u rokovima i prema planu. Pored navedenog ubrzano se radi na pripremi ostale dokumentacije koja će biti potrebna za raspisivanje tender za ovaj projekat.

Želimo se zahvaliti svima onima koji su dali doprinos implementaciji ovog višedecenijskog projekta, direktnim učesnicima, i to Vladi Federacije BiH i JP Ceste Federacije BiH, a posebno vlasnicima zemljišta, obzirom da su velikodušno prihvatili ovaj projekat bez obzira na činjenicu koliko su obeštećeni u konkretnom slučaju. Također, ovim informišemo naše građane i najavljujemo tokom ove godine i početak građenja treće završne faze ovog dijela saobraćajnice - Obilaznice u Bužimu.



USKORO OTPOČINJU RADOVI NA SANACIJI VODOCRPILIŠTA „PIVNICE“



Općina Bužim u okviru plana implementacije projekta vodosnabdijevanja općine Bužim, krajem 2019. godine je potpisala ugovor sa privrednim društvom Elkom d.o.o. iz Tuzle za sanaciju vodocrpilišta "Pivnice" sa kojeg se vodom za piće snabdijeva kompletno naselje mjesne zajednice Konjodor.

U okviru plana i u skladu sa dinamikom, danas su predstavnici općinskog načelnika i predstavnici firme „Elkom“, obišli objekat vodocrpilišta, gdje će u narednim danima početi sa izvođenjem radova na sanaciji pumpne stanice i montaže opreme.

Vrijednost ugovora o izvođenju radova i nabavci opreme iznosi 76.050,00 KM, a radovi će obuhvatiti i nabavku opreme visoke tehnologije u sistemu upravljanja i nadzorom nad vodovodnim sistemom, po uzoru na moderne vodovode u zemljama regije.

Na ovaj način želi se izbjeći svaki mogući faktor utjecaja na snabdijevanje vodom i prouzrokovanja kvarova i zastoja u vodosnabdijevanju.

„Za nekoliko dana uvodimo izvođača u posao. Naš cilj je jasan, a on je da po završetku radova vratimo vodovod „Pivnice“ u funkciju i da građani mjesne zajednice Konjodor imaju uredno snabdijevanje vodom“, kazao je načelnik Nanić.

POTPISANI UGOVORI ZA IZGRADNJU JAVNIH RASVJETA U TRI MJESNE ZAJEDNICE



U kabinetu Općinskog načelnika Mersudina Nanića potpisana su tri ugovora za izvođenje radova na izgradnji javnih rasvjeta u Mjesnim zajednicama Mrzovac-naselje Mušići, Elkaova Rijeka-naselja Hilići i Kedići, te u MZ Lubarda-naselje Abdići. Ugovor su potpisali načelnik Općine Bužim Mersudin Nanić i direktor firme „MC Stella“ Munib Ćatić.

Vrijednost potpisanih ugovora iznosi 21.859,00 KM, a rok za završetak radova na ovim projektima javnih rasvjeta je 60 dana.

„Potpisivanjem ugovora sa izvođačem radova završavamo proceduru izgradnje javnih rasvjeta u tri mjesne

zajednice Općine Bužim. Život ne smije stati ni tokom ove pandemije korona virusa i Općina Bužim će nastaviti sa realizacijom svih onih projekata koji se mogu realizirati u ovim uslovima. Obzirom da su troškovi izgradnje, održavanja i plaćanja računa električne energije za sve rasvjete na području naše općine dosta visoki, koristim ovu priliku da pozovem sve naše građane da redovno plaćaju komunalnu naknadu iz koje se finansiraju ovi troškovi kao i troškovi zimskog i ljetnog održavanja ulica i nekategorisanih puteva.“-kazao je načelnik Mersudin Nanić nakon potpisivanja ugovora.



RADOVI U TOKU NA VODOCRPILIŠTU „PIVNICE“

Načelnik općine Bužim Mersudin Nanić, sa saradnicima danas je obišao radove na objektu vodocrpilišta „Pivnice“, gdje se u posljednjih mjesec dana izvode radovi na uspostavi vodovoda, koji već duži vremenski period nije u funkciji. Zbog pandemije korona virusa radovi se odvijaju otežano i to u fazama. Trenutno se postavlja zamjenska pumpa u bunar, koja je danas testirana i čime će biti obezbijedena pogonska sigurnost za pravac pumpanja Rezervoara na Konjodoru. Pored postavke zamjenske pumpe, postavljena je i montažna oprema visoke tehnologije u sistemu upravljanja i nadzorom nad vodovodnim sistemom, po uzoru na moderne vodovode u zemljama regije. Na ovaj način želi se izbjeći svaki mogući faktor utjecaja na snabdijevanje vodom i prouzrokovanja kvarova i zastoja u vodosnabdijevanju. U narednim danima postaviti će se još hlorna stanica, gdje bi na taj način bilo sve spremno za puštanje vodovoda u funkciju. Mještani ističu da je problem prisutan već nekoliko godina, te da ih je obradovalo to što se radi na stvaranju uslova za bolje i urednije vodosnabdijevanje, te se nadaju da brojne porodice neće više živjeti u strahu kada će ostati bez vode.



„Očekujemo da ćemo sa ovom sancijom staviti u funkciju vodovod i da će građani mjesne zajednice Konjodor imati snabdijevanje vodom kakvo im i priliči- naglašava načelnik Nanić i ističe da od početka svog mandata traži rješenje na uspostavi vodovoda „Pivnice“ i da će mu jedan od sretnijih dana biti kada mještani naselja Konjodor u svojim kućama budu imali čistu i pitku vodu za piće.

ZAVRŠENA SANACIJA KVARA NA VODOVODU „PIVNICE“, OMOGUĆENO NORMALNO VODOSNABDJEVANJE

Općinski načelnik Mersudin Nanić, posljednjih mjeseci intenzivno radi na rješavanju vodosnabdijevanja Mjesna zajednice Konjodor. Tim povodom danas je načelnik prisustvovao puštanju vode sa vodovoda „Pivnice“, koji već duži vremenski period nije služio namjeni zbog kvara pumpe, montažne opreme i curenja hlora. Uprkos koroni virusu u protekla dva mjeseca odvijali se radovi, koji su podrazumijevali postavljanje zamjenske pumpe u bunar, te montiranje montažne opreme visoke tehnologije u sistemu upravljanja i nadzorom nad vodovodnim sistemom, po uzoru na moderne vodovode u zemljama regije. Pored navedenog postavljena je i nova hlorna stanica. Ukupna vrijednost izvedenih radova iznosila je 76.050,00 KM. Građani Mjesne zajednice Konjodor će konačno česme u svojim kućama koristiti u svrhe za koje su i namjenjene.



„Radovi su trajali nešto duže od predviđenog zbog problema s nabavkom potrebnog materijala iz inostranstva kao posljedice krize oko korona virusa. Mnogi su imali rezervu prema ovom projekt obzirom da nije bio u funkciji već dvije godine, i malo je onih koji su povjerovali da ćemo riješiti gorući problem vodosnabdijevanja. Također, unazad nekoliko mjeseci bili ste svjedoci medijske hajke koja je bila usmjerena prema ovom projektu i meni samom da ne želimo da naši sugrađani imaju vodu, mi smo nastavili raditi u tišini i evo danas smo dokazali suprotno i hvala Bogu naselje Konjodora ima čistu i pitku vodu. Iskreno se nadam da ćemo ovom sanacijom vodovoda „Pivnice“ konačno riješiti agoniju naših sugrađana. Na kraju želim se zahvaliti svima onima koji su dali doprinos da mještani Konjodora imaju vodu u svojim kućama“, kazao je načelnik Općine Bužim Mersudin Nanić.

OTPOČELI RADOVI NA REKONSTRUKCIJI NEKATEGORISANOG PUTA ABDIĆI-MUSIĆI



Nakon što je općina Bužim u proteklom mjesecu provela postupak javne nabavke i potpisala Ugovor sa Nadzorom za sve projekte koji će se izvoditi u toku godine na području općine Bužim, danas su otpočeli radovi na rekonstrukciji nekategorisanog puta ABDIĆI-MUSIĆI, za koji je u mjesecu martu potpisan Ugovor u Sarajevu između Općine Bužim, Ureda za koordinaciju projekta – PCU pri Federalnom ministarstvu poljoprivrede, vodoprivrede i šumarstva IFAD-a i izvođača radova firme „Kov-Grad“ iz Bužima.

Općina Bužim je imala obavezu obezbjediti nadzor za realizaciju ovog Ugovora, a vrijednost radova iznosi cc 60.000,00 KM.

Relizacijom ovog projekta riješit će se dugogodišnji problem sa neadekvatnom putnom komunikacijom za mještane naselja Abdići-Musići, te olakšati pristup do izvorišta „Musići“ sa kojeg se vodom za damačinstva napaja veći dio općine Bužim. U narednim danima očekuje se potpisivanje Ugovora za izvođenje radova na projektima koje će u 2020. godini općina Bužim realizirati zajedno sa građanima i namjenskim sredstvima sa viših nivoa vlasti za koje je do sada raspisano 4 tendera sa ukupno 41 LOTOM, a za koje su sredstva obezbjeđena u budžetu općine Bužim.

ZAMIJENJENA DOTRAJALA STOLARIJA NA ŠKOLI “RADOČ”



Na radoču su danas završeni radovi na zamjeni dotrajale stolarije na objektu osnovne škole. Riječ je o najstarijoj odgojno-obrazovnoj ustanovi na području općine Bužim. Sagrađena je daleke 1912. godine, ali iako najstarija uz pomoć brojnih akcija ova škola ima itekako dobre uslove za ovdašnje osnovce.

Projekat zamjene stolarije koja je upustala vodu u učionice inicirao je općinski načelnik Mersudin Nanić, a radovi su financirani od strane općine Bužim i humanitarne or-

ganizacije Human Social Society 4Life iz Austrije. Radove su izveli uposlenici ove škole uz pomoć mještana MZ Radoč.

Kraj radova danas su obišli općinski načelnik Mersudin Nanić, Muamer Ljubijankić ispred organizacije Human Social Society 4Life, kao i direktor Osnovne škole “Mirsad Salkić – Džaja” iz Čave Zeid Suljadžić koji je uručio zahvalnice najzaslužnijima.



POTPISANI UGOVORI ZA IZGRADNJU JAVNIH RASVJETA U MZ BUŽIM I MZ BRIGOVI



U kabinetu Općinskog načelnika Mersudina Nanića danas su potpisana dva ugovora za izvođenje radova na izgradnji javnih rasvjeta u Mjesnim zajednicama Bužim i Brigovi. Ugovore su potpisali načelnik Općine Bužim Mersudin Nanić i direktor firme d.o.o. „MC Stella“ Munib Čatić. Vrijednost potpisanih ugovora iznosi 30.550,00 KM, a rok za završetak radova na ovim projektima javnih rasvjeta je 60 dana.

„Potpisan je ugovor za izgradnju javne rasvjete u ulici 105.BUMB u MZ Bužim, a drugi ugovor je javna rasvjeta u MZ Brigovi-naselje Brigovi. Potpisivanjem ovih ugovora sa izvođačem radova nastavljamo sa projektima koje su kandidirali

naši sugrađani u cilju poboljšanja kvalitete života u ovim mjesnim zajednicama Općine Bužim. Očekujem da će radovi biti izvršeni u ugovorenom roku“ - kazao je načelnik Mersudin Nanić nakon potpisivanja ugovora.

POTPISANO NOVIH 5 UGOVORA ZA IZGRADNJU PUTNIH PRAVACA NA PODRUČJU OPĆINE BUŽIM

U sali općine Bužim potpisano novih 5 ugovora za izgradnju putnih pravaca na području općine Bužim.

Uz prisustvo predstavnika građevinskih odbora, ugovore su potpisali općinski načelnik Mersudin Nanić i predstavnica izvođača radova firme „Kov Grad“ d.o.o Bužim, Amra Nanić.

Potpisani ugovori se odnose na rekonstrukciju i modernizaciju 5 putnih pravaca:

- Nekategorisani put Biljeg, MZ Mrazovac,
- Nekategorisani put Breze, MZ Vrhovska,
- Nekategorisani put Dizdarevići – Đulići, MZ Mrazovac,
- Nekategorisani put Durići, MZ Bućevci,
- Nekategorisani put Radoč, MZ Radoč.

Kao što je već navedeno i ovi putni pravci se financiraju u sklopu projekta „Marka građani – marka Općina“.



UVOĐENJE U POSAO IZVOĐAČA RADOVA NA PROJEKTU TRGA „ALIJA IZETBEGOVIĆ“

Došao je značajan dan za sve Bužimljanke i Bužimljane, jer su predstavnici Federalnog ministarstva raseljenih osoba i izbjeglica uveli u posao izvođača radova, firmu „Kov Grad“ d.o.o Bužim, čime su zvanično i započeli radovi na izgradnji jednog od najvećih infrastrukturnih projekata u posljednjih deset godina na području Općine Bužim.

Naime, radi se o projektu izgradnje Trga „Alija Izetbegović“, koji je prošle godine na dan završnice manifestacije “Slobodarski dani viteškog grada Bužima” predstavljen uz prisustvo člana predsjedništva BiH Šefika Džaferovića.

Član predsjedništva BiH tom prilikom istakao je da lik i djelo rahmetli prvog predsjednika Nezavisne Republike Bosne i Hercegovine rahmetli Alije Izetbegovića zaslužuje da trg koji nosi njegovo ime u Bužimu bude završen, te je posebno istakao da će “snažno” podupirati i lobirati da do toga dođe u što skorije vrijeme, jer Bužimljani koji su dali veliku žrtvu i doprinos u odbrani BiH to zaslužuju. Današnjim uvođenjem u posao svijedočimo da su se riječi člana predsjedništva BiH zaista i obistinile na zadovoljstvo svih Bužimljana.

Pored predstavnika Federalnog ministarstva raseljenih osoba i izbjeglica, nadzora i izvođača radova uvođenju u posao prisustvovao je i općinski načelnik Mersudin Nanić, kao i brojni građani koji su željeli iskazati sreću i zadovoljstvo što će se graditi Trg „Alija Izetbegović“ u srcu čaršije.

Ukupna vrijednost ovog infrastrukturna projekta iznosi ukupno 379.942,76 KM, a najvećim dijelom finansira se preko Federalnog ministarstva raseljenih osoba i izbjeglica, dok će se jedan dio finansirati i iz budžeta Općine Bužim.

„Riječ je o jednom velikom i značajnom projektu kojim ćemo građanima Bužima osigurati da uživaju u moderno uređenom trgu sa svim popratnim sadržajima, u potpunosti opremljen komunalnom infrastrukturom i prilazima, te estetski ga i funkcionalno oblikovati kako bi postao oaza okupljanja građana Općine Bužim i svi onih koji dolaze u naš Viteški grad Bužim. Gotovo sam siguran da je ovo jedan hair posao koji smo od početka radili na pravi način i moram, zaista, u svoje lično ime i građana Općine Bužim iskazati veliko zadovoljstvo što danas dolazimo do početka radova. Posebno ističem da bez našeg jedinstva, te kadrova SDA koji su na višim nivoima vlasti nije moguće realizirati ovakve infrastrukturne projekte. Stoga posebnu zahvalu upućujem predsjedniku SDA BiH Bakiru Izetbegoviću i članu predsjedništvu BiH gospodinu Šefiku Džaferoviću koji su prepoznali važnost izgradnje ovog infrastrukturnog projekta, kao i svima onima koji su doprinijeli da se Trg u Bužimu završi“, kazao je načelnik Općine Bužim Mersudin Nanić.



POTPISANI UGOVORI ZA IZGRADNJU 7 PUTNIH PRAVACA NA PODRUČJU OPĆINE BUŽIM

Nakon provedene tenderske procedure u postupku javnih nabavki danas su u prostorijama JU „Centra za kulturu, sport i informisanje“ Bužim, potpisani ugovori za izgradnju sedam putnih pravaca.

Uz prisustvo predstavnika građevinskih odbora, ugovore su potpisali općinski načelnik Mersudin Nanić i izvođač radova direktor firme „Kov Grad“ d.o.o Bužim, Safet Kovačević.

Važno je napomenuti da će se ove godine na području Općine Bužim u sklopu projekta „Marka građani-mar-ka Općina“ graditi ukupno 42 putna pravca, te pored ostalih projekata koji se trenutno rade i nekih koji su u pripremi Bužim će zasigurno 2020. godinu obilježiti kao godinu investicija.

Prvi potpisani ugovori se odnose na rekonstrukciju i modernizaciju 7 putnih pravaca, koji će se graditi u mjesnim zajednicama: – Zaradostovo i to nekategorisani putevi Kiurića brdo, Palijan i NP Palijan, – MZ Konjodor nekategorisani put Pajalići preko vode, – MZ Lubarda nekategorisani put Abdići – Šekići i Husin put, – MZ Brigovi nekategorisani put Spahići – Mulalići, a kao što je već navedeno navedeni putni pravci se financiraju u sklopu projekta „Marka građani – marka Općina“.

Vrijednost potpisanih ugovora iznosi cca 620.780,00 KM.

Isto tako ugovori za preostalih 35 putnih pravaca potpisat će se u narednim danima kada bude sprovedena tenderska procedura i na taj način steknu se uslovi za potpisivanje istih.

„Izražavam zadovoljstvo što smo danas otpočeli sa potpisivanjem ugovora za izgradnju prvih sedam putnih pravaca u sklopu projekta „Marka građani-mar-ka Općina“. Svjedoci ste da ove godine velika sredstva

ulažemo u infrastrukturu. Radiće se ukupno 42 putna pravca. Moja je želja da svaki zaseok ima asfaltiran put, kako bi mještanima poboljšali uslove života. Sve one projekte koje građani traže i iniciraju podrška Općine je neupitna kao šta je to i u ranijim godinama bila praksa.“ kazao je načelnik Nanić.



SVEČANO PUŠTENA U RAD NOVOIZGRAĐENA JAVNA RASVJETA U MJESNOJ ZAJEDNICI BUČEVCI

Načelnik Općine Bužim Mersudin Nanić večeras je uz prisustvo, predsjednika Mjesne zajednice, izvođača radova, te mnogobrojnih gostiju i mještana, svečano pustio u rad novoizgrađenu javnu rasvjetu u Mjesnoj zajednici Bučevci-Centar. Sredstva su obezbijedena iz budžeta Općine Bužim, dok je jedan dio sredstava prikupljen i od strane mještana pomenute Mjesne zajednice.

„Projekat koji smo završili u ovoj Mjesnoj zajednici možemo smatrati jako bitnim projektom zbog djece koja svakodnevno idu u školu ovom dionicom koja je dosad bila neosvijetljena i zbog toga što je ovo jako bitan projekat za sve mještane, kao i one koji prolaze ovom dionicom puta. Nastavljamo sa projektima iz Budžeta kada je u pitanju izgradnja rasvjeta i sa svim onim projektima koji znače razvoj našeg Bužima. Također važno je napomenuti da vodimo aktivnosti i na zamjenama postojećih rasvjetnih tijela sa led sijalicama, koja nam sasvim sigurno donose uštedu električne energije na godišnjem nivou.” kazao je načelnik Mersudin Nanić.



ČIŠĆENJE I UREĐENJE KORITA BUŽIMNICE

Tokom proteklog vikenda izvršeno je čišćenje i uređenje korita Bužimnice od ulaza na obilaznicu do Trga Alije Izetbegovića. Radove na uređenju korita Bužimnice izvršilo je poduzeće “Velić-cop”, a pranje obilaznice Vatrogasna jedinica općine Bužim.

“Obzirom da je korito Bužimnice zaraslo u kory, te činjenice da su počeli radovi na uređenju Trga "Alija Izetbegovića", odlučili smo urediti ovaj prostor, a prije svega jer Bužimnica u vrijeme obilnih padavina za relativno kratko vrijeme može dostići visok nivo i izlivanje. Nailazak velikih voda dovodi do odlaganja značajnih količina nanosa i otpada u samom koritu koje je sada prošireno, očišćeno i uređeno”.-kazao je načelnik općine Bužim Mersudin Nanić.



U RAD PUŠTENA RASVJETA U MZ ELKASOVA RIJEKA

Načelnik općine Bužim Mersudin Nanić, zajedno sa saradnicima, izvodacem radova, vijećnicima u Općinskom vijeću i velikog broja mještana, večeras su svečano pustili u rad novoizgrađenu javnu rasvjetu u Mjesnoj zajednici Elkasova Rijeka, zaseok Hilići-Nahici.

Sredstva za izgradnju javne rasvjete obezbijedena su iz Budžeta općine Bužim, dok je jedan dio sredstava prikupljen od strane mještana.

Općinski načelnik Mersudin Nanić izrazio je zadovoljstvo izvedenim radovima na javnoj rasvjeti te se zahvaljuje mještanima zaseoka Hilići-Nahici na strpljenju i nesebičnoj podršci koju mu pružaju. Načelnik se zahvalio i Podružnici Elektrodistribucije Bihać, poslovna jedinica Bužim koji su izašli u susret pri realiziranju projekta kao i svima drugima koji su dali doprinos pri realiziranju ovoga izuzetno značajnog projekta za sve nas.



POČINJU RADOVI I NA IZGRADNJI KRUŽNOG TOKA

Nakon početka radova na projektu izgradnje i uređenja Trga "Alija Izetbegović", jučer je izvođač radova uveden i na projekat izgradnje i rekonstrukcije saobraćajnice – kružnog toka.

Predstavnici Javnog poduzeća Ceste F BiH, Nadzorni organ, predstavnici firme Kov-Grad d.o.o. Bužim i načelnik općine Bužim Mersudin Nanić sa saradnicima ozvaničili su početak radova na ovom značajnom projektu koji će zasigurno izmijeniti sliku užeg gradskog središta.

Ukupna vrijednost izgradnje i rekonstrukcije ovog dijela saobraćajnice koja se naslanja na Trg "Alija Izetbegović" je oko 1,3 miliona konvertibilnih maraka, a finansirat će se iz budžeta Javnog poduzeća ceste F BiH.



–„Danas smo posebno sretni što počinju radovi na dugo očekivanom projektu izgradnje kružnog toka na zaobilaznici i kompletnom uređenju prostora Trga "Alija Izetbegović". Želimo završavati projekte od posebnog značaja za lokalnu zajednicu i ovom prilikom se želim zahvaliti svima onima koji su dali svoj doprinos, a posebno Federalnoj direkciji za ceste koja je investitor“, - rekao je načelnik općine Bužim Mersudin Nanić prilikom predaje gradilišta izvođaču radova.

POTPISANI UGOVORI ZA OSAM LOKALNIH PUTNIH PRAVACA

U prostorijama Centra za kulturu, sport i informisanje“ Bužim, potpisano je još osam ugovora za izgradnju i rekonstrukciju nekategorisanih putnih pravaca uz prisustvo predstavnika građevinskih odbora i izvođača radova. Ugovore su potpisali općinski načelnik Mersudin Nanić i izvođač radova direktor firme „Kov Grad“ d.o.o Bužim, Safet Kovačević.

I ovi projekti rekonstrukcije i izgradnje putnih pravaca koji će se raditi na području Općine Bužim kandidirani su od strane građana i finansiraju se zajedničkim sredstvima općine

Bužim i sredstvima građana u jednakim iznosima. Ove godine građani su kandidirali 42 lokalna putna pravca, a radovi su već počeli i ovih dana se očekuje završetak prvih metara asfaltnog puta na dva putna pravca.

Ugovori su potpisani za slijedeće lokale putne pravce i ulice:

- MZ Elkasova Rijeka- NP Elkasovići-Drage-Jusića korita
- MZ Brigovi – NP Međugorje
- MZ Bužim- ul. Safvet bega Bašagića
- MZ Mrazovac – NP Šekića dolovi-Pašića majdan
- MZ Mrazovac- NP Burzići-Ćorića glavica-Džambići
- MZ Mrazovac- NP Pašići- Šabića brdo
- MZ Konjodor- NP Pajalići kod škole
- MZ Lubarda Eminići-Abdići – Čaglica

Vrijednost potpisanih ugovora iznosi 577.099,00 KM.

–„I pored opstrukcija kod provođenja ovih projekata koje smo imali tokom ove godine i širenja raznih dezinformacija, konačno možemo reći da će svi putni pravci koji su kandidirani biti i završeni u ovoj godini. Ono što sam stalno govorio na sastancima sa građevinskim odborima se obistinilo i niko nema pravo da bude protiv projekata koje su kandidirali građani i za koje su prikupljena zajednička sredstva koja prelaze milion konvertibilnih maraka“-rekao je načelnik općine Bužim Mersudin Nanić nakon potpisivanja ugovora sa izvođačem radova.



PUŠTENA U RAD JAVNA RASVJETA U MJESNIM ZAJEDNICAMA MRAZOVAC I LUBARDA

Načelnik Općine Bužim, Mersudin Nanić uz prisustvo izvođača radova, vijećnika u Općinskom vijeću i mnogobrojnih mještana, svečano u rad pustio novoizgrađenu javnu rasvjetu u Mjesnoj zajednici Mrazovac, zaseok Mušići te u Mjesnoj zajednici Lubarda, zaseok Eminići-Abdići.

Sredstva za realizaciju ova dva projekta obezbijedena su iz budžeta Općine Bužim, dok su jedan dio sredstava prikupili i mještani.

Načelnik ovom prilikom kazao je da je ovo bio dugogodišnji problem ove dvije mjesne zajednice i evo konačno je došlo do realizacije ova dva projekta. Naravno, izgradnja ove dvije rasvjete je vrlo bitna iz razloga što je velika komunikacija saobraćaja i pješaka na tim lokacijama gdje je izgrađena javna rasvjeta.

Također mještani pomenutih Mjesnih zajednica nisu krili zadovoljstvo što je došlo do izgradnje javnih rasvjeta.

Općinski načelnik u narednom periodu nastavlja sa realizacijom sličnih projekata za dobrobiti svih građana Općine Bužim.



NASTAVLJA SE ZAŠTITA I REKONSTRUKCIJA STAROG GRADA

Načelnik općine Bužim Mersudin Nanić potpisao je danas ugovor sa poduzećem "Neimari" d.o.o. iz Sarajeva za projekat rekonstrukcije sjevero-zapadnog vanjskog bedemskog zida i ulazne drvene kapije na Starom gradu Bužim. Vrijednost potpisanog ugovora je 68,913,00 KM, a rok za izvođenje radova je devedeset dana.

Komisija za očuvanje nacionalnih spomenika je još 2003. godine donijela Odluku o proglašenju graditeljske cjeline – Stari grad Bužim nacionalnim spomenikom. Ovom odlukom je jasno definiran status Starog grada, njegova zaštita i rekonstrukcija. U zadnjih sedam godina nisu vršeni značajniji radovi na zaštiti ovog nacionalnog spomenika kao graditeljske cjeline kojom se s pravom ponose bužimljani.

"Rekonstrukcijom bedemskog zida i postavljanjem ulazne kapije nastavljamo sa zaštitom nacionalnog spomenika. Izgradnja ovog dijela sjevero-zapadnog zida uz sami ulaz na Stari grad stvaraju se bolji sigurnosni uslovi za sve posjetioce. Obzirom na činjenicu da je ostalo još dosta posla na završetku zaštite Starog grada Bužim, uvjeren sam da će se i u narednim godinama nastaviti konzervacija našeg dragulja" istakao je načelnik općine Bužim Mersudin Nanić nakon potpisivanja ugovora.



POTPISANI UGOVORI ZA REKONSTRUKCIJU I MODERNIZACIJU JOŠ DVANAEST PUTNIH PRAVACA

Načelnik Općine Bužim Mersudin Nanić u prisustvu predsjednika građevinskih odbora potpisao je danas ugovore sa izvođačem radova za rekonstrukciju i modernizaciju još dvanaest putnih pravaca na području općine Bužim.

Ugovori su potpisani sa firmom „Kov Grad“ iz Bužima, a riječ je o slijedećim putnim pravcima:

1. Rekonstrukcija i modernizacija nekategorisanog puta Buljubašići-Haralčići-Šakonjići, MZ Elkasova Rijeka,
2. Rekonstrukcija i modernizacija nekategorisanog puta Čava-Zimonje, dionica Dizdarevića brdo-Čava, MZ Čava,
3. Rekonstrukcija i modernizacija nekategorisanog puta Kedići, MZ Elkasova Rijeka,
4. Rekonstrukcija i modernizacija ulice Patriotske lige, MZ Bužim,
5. Rekonstrukcija i modernizacija nekategorisanog puta Mulalići-Podovi, MZ Lubarda,
6. Rekonstrukcija i modernizacija nekategorisanog puta Konjodor-Ljubijankići, MZ Konjodor,
7. Rekonstrukcija i modernizacija nekategorisanog puta Isakovići, MZ Bućevci,
8. Rekonstrukcija i modernizacija nekategorisanog puta Donji Konjodor, MZ Konjodor,
9. Rekonstrukcija i modernizacija nekategorisanog puta Ajkići, MZ Mrazovac,
10. Rekonstrukcija i modernizacija nekategorisanog puta Mustafići-Radoč, MZ Radoč,
11. Rekonstrukcija i modernizacija nekategorisanog puta Jusići-Progon, MZ Konjodor,
12. Rekonstrukcija i modernizacija nekategorisanog puta Porići-Podići, MZ Mrazovac.

Predsjednici građevinskih odbora bili su više nego zadovoljni potpisivanjem ugovora, čime su stvoreni uslovi za početak izgradnje puteva u njihovim Mjesnim zajednicama, odnosno zaseocima.

Načelnik Nanić prilikom potpisivanja ugovora kazao je da se sa ovim aktivnostima nastavlja da razvija lokalna zajednica, te naglasio da učešće u asfaltiranju i rekonstrukciji puteva učestvuje Općina i građani zajedničkim sredstvima, što je jedinstven primjer u BiH da građani učestvuju u infrastrukturnim projektima u jednoj lokalnoj zajednici. Između ostalog dodao je da je Općina Bužim zajedno sa svojim građanima pokazala kako se voli i gradi lokalna zajednica, te istakao da Općina Bužim spada u red općina sa najviše asfaltiranih dužnih metara lokalnih i nekategorisanih puteva koji su izgrađeni zajedničkim sredstvima građana i Općine.



U TOKU UREĐENJE STAROG GRADA BUŽIM I JAVNIH POVRŠINA



Ovih dana izvode se radovi na uređenju okoliša nacionalnog spomenika Starog grada Bužim. Radi se o siječenju šiblja i drveća koje dugi niz godina nije sječeno zbog čega su dijelovi Starog grada bili potpuno nedostupni.

Radove koje izvodi bužimska firma za uređenje zelenih površina "Trimex" a financira Općina Bužim, obišao je načelnik općine Bužim Mersudin Nanić.

Načelnik je u svojoj izjavi naglasio da je posebno sretan što Stari grad Bužim dobija "novi sjaj", nakon prošlogodišnjeg čišćenja, postavljanja jarbola sa velikom zastavom te osvjetljavanja ovog najznačajnijeg bužimskog nacionalnog spomenika, koji će nakon ovih radova imati bolju dostupnost i sigurnost svim zainteresovanim posjetiocima.

Nakon uređenja Starog grada, planirano je uređenje i čišćenje Dječijeg igrališta kod OŠ Bužim kao i "Parka mladih" koji je trenutno gotovo nedostupan koliko zaraslošću šibljem, toliko i nesavjesnim onečišćenjem posjetioca.

FEDERALNA VLADA OPĆINI BUŽIM UPLATILA 599.426,98 KM



Vlada Federacije Bosne i Hercegovine danas je na račun općine Bužim uplatila sredstva u ukupnom iznosu od 599,426,98 KM.

Iznos od 125.000,00 KM je financijka pomoć budžetu općine Bužim, odnosno pomoć u poduzimanju preventivnih mjera u borbi protiv COVID-19 i sanacije posljedica nastalih uslijed proglašene pandemije. Drugi dio odobrenih sredstava je za sufinansiranje kapitalnih i infrastrukturnih projekata, gdje je općina Bužim prijavila svoje projektne prijedloge uz popratnu dokumentaciju na Javni poziv kojega je raspisala Vlada FBiH.

Tako je općina Bužim pripremila svu potrebnu dokumentaciju te na ovaj javni poziv prijavila projekat „Marka građanin-marka Općina“ za koji je Vlada FBiH dodjelila sredstva u iznos od 474.426,98 KM.

Općina Bužim je zadnjih godinu dana veoma uspješna u privlačenju sredstava sa viših nivoa, tako je pored navedenih sredstava dodatno za projekte na području cijele općine Bužim obezbijedeno cca 3 miliona konvertibilnih maraka.

Važno je pomenuti da je za ovu godinu, općina Bužim zajedno sa građanima koji su prikupili vlastita sredstva inicirali i pokrenuli rekonstrukciju i modernizaciju 42 putna pravca lokalne i nekategorisane putne mreže u sklopu navedenog projekta, a gdje su sami građani prikupili vlastitih sredstava preko 1 milion konvertibilnih maraka i ovo je jedinstven primjer u državi BiH da građani zajedno sa lokalnom zajednicom ulažu u infrastrukturne projekte u namjeri da im lokalna zajednica obezbijedi dodatna sredstava kako bi projekti bili uspješno realizirani.

„Građani općine Bužim i ja kao općinski načelnik možemo biti zadovoljni odlukom Federalne vlade što su uplaćena sredstva za projekte na području Općine koji se trenutno izvode, a u što su se svi naši građani mogli uvjeriti ovih dana. Iako su „neki“ govorili da se putevi neće raditi jer nema sredstva u budžetu i da se sredstva ne mogu obezbijediti sa viših nivoa za projekte građana. Današnjom uplatom sredstava poručujem svima onima da će se 42 putna pravca za koje smo potpisali ugovore, ako Bog da u kratkom roku i završiti na zadovoljstvo svih nas. Na kraju želim se ispred građana općine Bužim zahvaliti Vladi FBiH na čelu sa premijerom Fadilom Novalićem, te ministru Dediću što su u proteklom periodu podržavali sve infrastrukturne projekte sa području naše općine. Samo bez podjela te svojim radom i trudom zajedničkim snagama možemo graditi i razvijati naš Bužim“, kazao je načelnik općine Bužim Mersudin Nanić.

MZ KONJODOR: SVEČANO OTVOREN NOVOASFALTIRANI PUT U NASELJU PAJALIĆI



Nakon što su potpisani ugovori za izgradnju 42 putna pravca u sklopu projekta „Marka građani-marka Općina“, sa zadovoljstvom možemo kazati da se u svim Mjesnim zajednicama izvode radovi na izgradnji putnih pravaca, s tim da je danas otvoren i prvi izgrađen putni pravac.

Tim povodom načelnik Općine Bužim Mersudin

Nanić i predsjednik građevinskog odbora Zijad Pajalić su danas uz prisustvu mještana i brojnih zvanica svečano i otvorili novoasfaltirani put Pajalići preko vode u MZ Konjodor. Vrijednost radova na asfaltiranju navedenog puta je oko 133.000,00 KM, gdje su građani učestvovali vlastitim sredstvima uz podršku Općine Bužim i kantonalnih institucija.

„Trebamo svi zajedno učiniti da preostala dionica bude realizovana a Općina Bužim je spremna, kao što je i do sada, pratiti realizaciju ovog projekta i vjerujem da će i mještani biti spremni da prate ovaj projekat, ali uz podršku viših nivoa vlasti ovaj proces završetka dionice bi se uveliko ubrzao“, kazao je načelnik Općine Bužim Mersudin Nanić. U narednim danima bit će upriličeno svečano otvorenje za još nekoliko izgrađenih putnih pravaca na području Općine Bužim.



U RAD PUŠTENA NOVA LED RASVJETA U MZ BRIGOVI

Urad je puštena novoinstalirana led rasvjeta u MZ Brigovi. Riječ je o kompletno zamijenjenoj dosadašnjoj rasvjeti novom led rasvjetom.

Prema riječima načelnika općine Bužim Mersudina Nanića zamjenom postojeće rasvjete dugoročno prave se velike uštede kad je u pitanju potrošnja električne energije za ovu namjenu a koju plaća općina Bužim. Kako kaže u budućnosti će i druge mjesne zajednice sa područja općine Bužim dobiti led rasvjetu.



ASFALTIRANI PUTNI PRAVCI DIZDAREVIĆI-ĐULIĆI I PAŠIĆI-ŠABIĆA BRDO

Načelnik općine Bužim danas je sa brojnim mještanima Dizdarevića, Đulića, Pašića i Šabića brda, podijelio radost tako što je prisustvovao završnom asfaltiranju lokalnog puta Dizdarevići-Đulići i nekategorisanog puta Pašići-Šabića brdo u Mjesnoj zajednici Mrzovac.

Riječ je o rekonstrukciji i modernizaciji lokalnog i nekategorisanog puta u ukupnoj dužini od 2300 metara koji će za građane ovog dijela općine Bužim imati veliki značaj.

Ukupna vrijednost radova za navedena dva putna pravca je oko 355.000,00 KM i ovo su najzahtjevniji i najduži putni pravci od svih 42 putna pravca koji će se ove godine realizirati na području općine Bužim.



I ova dva putna pravca rađena su u sklopu projekta „pola građani-pola općina“. Kao i sve putne pravce tako i ove Općina je sufinansirala, odnosno obezbijedila preko Vlade FBiH, dok su i građani učestvovali sa pola sredstava. Izvođač radova je firma „Kov-Grad“ doo Bužim.

„Danas smo uspješni i zvanično spojiti ova dva putna pravca, koji povezuje mnoga sela i zaseoke ovog mjesta sa centrom općine Bužim. Želim čestitati građanima na realizaciji ovih značajnih projekata. Obzirom da im je onaj doskoroš-

ji, makadamski, pričinjavao velike probleme tokom ljeta zbog prašine, a u jesen i zimi zbog udarnih rupa, zadavao velike glavobolje. Asfaltiranjem puta ovi problemi su riješeni i kvalitet života mještana podignut na viši nivo“, kazao je načelnik općine Bužim Mersudin Nanić.

Mještani su zadovoljni sa izvođačem radova, jer je put jako kvalitetno urađen.

Zahvalili se načelniku općine Bužim, Vladi FBiH na čelu sa premijerom Fadilom Novalićem i svima onima koji su na bilo koji način podržali izgradnju njihovih projekata.



ASFALTIRAN PUT JOHARI-HAKIĆI

Uspješno je završena realizacija rekonstrukcije nekategorisanog puta Johari-Hakići u Mjesnoj zajednici Mrazovac. Radi se o dionici dužine 655,62 metara. Vrijednost urađenih radova je 97.118,91 KM, a finansirali se u sklopu programa „Marka građani-marka Općina“.

Mještani naseljenog mjesta Hakići su iskazali svoju zahvalnost na podršci koju im je pružio Općinski načelnik u ovom projektu, te su istakli da je ovo asfaltiranje puta od posebne važnosti ne samo za ovo, već i za sva okolne zaseoke koji prolaze ovom dionicom puta prema centru čaršije.

Općinski načelnik Mersudin Nanić smatra da ovaj projekt i njemu slični imaju veliki značaj kako za mještane, tako i za građane cijele općine Bužim. Načelnik je realizacijom projekata ovog tipa istakao važnost razvoja putne infrastrukture na području općine Bužim.



ZA BUŽIM 5 MILIONA KM NOVIH INVESTICIJA



Općinski načelnik Mersudin Nanić i predsjednik OO SDA Bužim Abid Mulalić održali su u proteklom mjesecu radni sastanak sa direktorom Elektrodistribucije Bihać Zijadom Mujagićem.

Tom prilikom, razgovarano je o planovima ulaganja JP Elektroprivrede BiH u elektrodistributivnu mrežu na području općine Bužim na osnovu zahtjeva koje je općinski načelnik uputio u toku ove i prošle godine prema ovom preduzeću. Direktor Elektrodistribucije Bihać Zijad Mujagić, istako je da će se u što kraćem roku izvršiti rokonstrukcija niskonaponske mreže na

području općine Bužim sa naglaskom na područja za koja su iskazana posebna interesovanja, te da će se izgraditi dodatna transformatorska stanica SN/NN, kao i da se realiziraju druga investiciona ulaganja u modernizaciju elektrodistributivne mreže, kako bi se svim kupcima obezbijedila kvalitetna isporuka električne energije. „Građani općine Bužim evidentno da duži niz godina imaju problem sa kvalitetnim snadbijevanjem električnom energijom u više Mjesnih zajednica na području općine Bužim, te se svojim zahtjevima obraćaju svakodnevno u Općinski organ uprave zbog rješavanja navedenog problema. Iz tog razloga već smo nekoliko puta uputili zahtjeve, urgencije i svakodnevno smo pregovarali sa predstavnicima Elektrodistribucije u vezi ovog problema. Trenutno prema aktivnim ugovorima, planirano je da se do kraja 2020. godine realizira niskonaponska mreža u Veladžićima, Polje, Zaradostovo 1, Bućevci 1 i Haralčići-Buljubašići-Veladžići. Također početkom iduće godine očekujemo nastavak rekonstrukcije niskonaponskih mreža i u onim Mjesnim zajednicama za koje smo u više navrata i iskazali interesovanje a to su MZ Lubarda, Zaradostovo, Konjodor, Čava, Radoč Elkasova Rijeka i MZ Jusufovići. Ono što bude do lokalne zajednice, a tiče se neophodnih procedura i saglasnosti riješavat ćemo odmah kako bi ubrzali investicije“, istakao je načelnik Mersudin Nanić.

STOLARIJA NAKON 25 GODINA

Trebalo je tačno dvadeset i pet godina da se na stambeno-poslovnoj zgradi u centru grada zamjeni stolarija. U toku rata ova zgrada je oštećena, a granata je u potpunosti uništila stolariju na stubištu zgrade. Pored činjenice da je bez stolarije stanarima ove zgrade bilo teško zagrijati prostorije, tako i zbog samog vanjskog izgleda. Kako se ovih dana intezivno radi na završetku trga "Alija



Izetbegović" bilo je više nego potrebno da se sanira ulazna stolarija na ovoj zgradi i promijeni njen izgled.

"Zaista je bilo vrijeme da se ugradi stolarija na ovoj zgradi i stvore bolji uvjeti života za stanare najstarije zgrade u Bužimu. Kako se zgrada nalazi na samom trgu "Alija Izetbegović", čije je uređenje u toku, to je bio i motiv više da se u potpunosti uredi ovaj prostor i izmjeni slika središta grada. Svakako treba u budućnosti planirati i potpuno vanjsko uređenje ove zgrade i ja vjerujem da će se to i desiti uz pomoć prije svega općine Bužim ali i svih stanara koji žive u ovoj zgradi," - istakao je načelnik općine Bužim Mersudin Nanić prilikom obilaska radova.

ASFALTIRAN PUT RADOČ-KRIŽ

Završeno asfaltiranje još jednog nekategorisanog puta, u dužini od 1183 m na relaciji Radoč-Križ u mjesnoj zajednici Radoč. Ukupna vrijednost projekta je 177.139,42 KM. I ovaj nekategorisani put kao i prethodnih urađeni su u sklopu programa „Marka građani-marka Općina“. Općinski načelnik sa saradnicima posjetio je navedeno naselje i tako podijelio radost sa prisutnim mještanima. Mještani su iskazali svoju zahvalnost na podršci koju im pruža Općinski načelnik u ovom a i u drugim projektima, te su istakli da je ovo asfaltiranje puta od posebne važnosti za sve njih jer će lakše moći doći do čaršije.



„Svaki put kad se uradi je veoma važan, a danas sam posebno sretan što je asfaltiran upravo ovaj put i to iz dva razloga, jedan je zbog svih mještana koji će svakodnevno koristiti navedeni put, a drugi zbog činjenice da se upravo ovim putem ide na mjesto obilježavanja jedne od najsajnijih bitaka koju su izveli pripadnici 505. viteške brigade a to je slavna bitka "Breza '94", istakao je načelnik Mersudin Nanić.



U ULICAMA „PATRIOTSKE LIGE I 105.BUMB“ PUŠTENA U FUNKCIJU JAVNA RASVJETA

Načelnik Mersudin Nanić sinoć je uz prisustvo brojnih mještana svečano pustio u rad novoizgrađenu javnu rasvjetu u ulicama Patriotske lige i 105.BUMB u Mjesnoj zajednici Bužim, dok je jedan dio rasvjete postavljen i prema Mrazovcu. Sredstva su obezbijedena iz budžeta općine Bužim i jedan dio sredstava prikupili su mještani. Mještani su povodom puštanja u funkciju javne rasvjete istakli da ovaj projekt mnogo znači za ove ulice koje su skoro pa u centru čaršije i da je ovo rezultat zajedničkog rada Općinskog načelnika i mještana, što šalje jednu dobru poruku i pozitivnu sliku, prije svega građanima općine Bužim.

„Općina Bužim ulaže budžetska sredstva u obnovu i modernizaciju komunalne i saobraćajne infrastrukture na području cijele Općine, kako bi naselja koja godinama nisu imala rasvjetu bila osvijetljena, a građani ovih naselja imalo bolje uslove za život. Projekat koji završavamo u ovim ulicama možemo smatrati jako bitnim projektom naročito zbog djece koja svakodnevno idu u školu ovom dionicom koja je dosad bila neosvijetljena i zbog toga je ovo posebno važan projekat za sve nas“, kazao je načelnik Mersudin Nanić



POTPISAN UGOVOR ZA ČIŠĆENJE NATKRIVENOG DIJELA KORITA BUŽIMNICE I ĐORMAJA

Načelnik općine Bužim Mersudin Nanić potpisao je danas ugovor sa poduzećem „KOV-GRAD“ o izvođenju radova na čišćenju natkrivenog dijela korita Bužimnice i Đormaja, a vrijednost ugovora je 19,890,00 KM.

–Obzirom da su pri kraju građevinski radovi na Trgu Alija Izetbegović, danas smo potpisali ugovor o čišćenju natkrivenog dijela Bužimnice i Đormaja, a zbog činjenice da od izgradnje mosta i natkrivanja dijela Bužimnice i Đormaja nije vršeno čišćenje. Čišćenjem i uređenjem ovog natkrivenog dijela potoka zasigurno će se povećati protok vode i spriječiti izlivanje Đormaja i Bužimnice tokom jesenjih kiša.–istakao je načelnik općine nakon potpisivanja ugovora.



U RAD PUŠTENA RASVJETA I PODIGNUTE ZASTAVE NA TRGU ALIJA IZETBEGOVIĆ U BUŽIMU

Na radost Bužimljanki i Bužimljana sinoć je u rad puštena rasvjeta koja obuhvata područje novoizgrađenog trga “Alija izetbegović” i kružnog toka što čini još jedan korak ka konačnom izgledu ovog dugoočekivanog projekta u Bužimu.

Takođe sinoć su i simbolično podignute zastave, i to “Ljiljanka” na samom kružnom toku, a podigli su je predstavnici udruženja dobitnika najviših prizanja i odlikovanja općine Bužim. Takođe uporedo s njom na mjestu i dijelu trga koji predstavlja spomen obilježje prvom predsjedniku RBiH Aliji Izetbegoviću podignute su i zastava Bosne i Hercegovine, zastava općine Bužim i zastava 505. viteške brigade.

Načelnik općine Bužim Mersudin Nanić u svojoj izjavi se zahvalio svima koji su dali svoj doprinos u izgradnji trga i kružnog toka te najavio nove projekte koji će krasiti ovu Općinu. Napomenuo je kako građane svečeno otvorenje trga očekuje u narednom periodu kada će biti finalizirani i ostali radovi, poput dovršetka popločavanja, ozelenjavanja trga i drugih detalja koji će ga krasiti.



POTPISAN UGOVOR ZA IZRADU PROJEKTO-TEHNIČKE DOKUMENTACIJE ZA VATROGASNI DOM

Načelnik općine Bužim Mersudin Nanić danas je potpisao ugovor za poduzećem “AMG-PROJEKAT” iz Velike Kladuše za izradu projektno tehničke dokumentacije Vatrogasnog doma koji će koristiti vatrogasna jedinica općine Bužim. Vrijednost potpisanog ugovora je 7.605,00 KM, a rok za izradu projektno-tehničke dokumentacije je 60 dana od dana potpisivanja ugovora.

–“Radi se o kapitalnom projektu za našu Općinu koji se odnosi na značajno poboljšanje društvene infrastrukture, ali naravno i viši stepen zaštite stanovništva i njihove imovine. Idemo hrabro i odvažno u ovaj projekt vjerujući u uspješan završetak Vatrogasnog doma ali i pomoć drugih nivoa vlasti u izgradnji čiji se početak očekuje već naredne godine”,- istakao je načelnik općine Bužim Mersudin Nanić nakon potpisivanja ugovora.



POTPISANI UGOVORI ZA IZGRADNJU TRI JAVNE RASVJETE NA PODRUČJU OPĆINE BUŽIM

Nakon provedenog postupka javne nabave načelnik općine Bužim Mersudin Nanić je danas sa Munibom Čatićem vlasnikom firme „MC Stella“ potpisao ugovor o izvođenju radova na izgradnji tri javne rasvjete, koje će se graditi u ulici Armije BiH, zaseok Dervići i zaseok Vrhovska-Rudnik.

Ukupna finansijska vrijednost za sve tri javne rasvjete iznosi 18.661,50 KM, a navedena sredstva osigurana su na osnovu programa „Marka građani-marka Općina“.

„Cilj implementacije ovih javnih rasvjeta na području navedene ulice i zaseoka jeste doprinos većoj sigurnosti građana, te bezbjednosti pješaka i drugih učesnika u saobraćaju. U proteklom periodu mi smo u Bužimu uradili odličan posao kad je u pitanju izgradnja javne rasvjete, a pored toga osvijetljeno je i nekoliko vrlo frekventnih lokacija u našem viteškom i ponosnom gradu Bužimu. Iskreno se nadam da ćemo i u 2021. godine nastaviti istim tempom kako bi uradili što više projekata u našem Bužimu“, kazao je načelnik općine Bužim Mersudin Nanić.



POTPISANI UGOVORI ZA MODERNIZACIJU DVA PUTNA PRAVCA

Danas su u općini Bužim potpisana dva nova ugovora o rekonstrukciji i modernizaciji nekategorisanih puteva u dvije Mjesne zajednice. Općinski načelnik Mersudin Nanić i predstavnica firme d.o.o „KOVGRAD“ Bužim potpisali su danas dva ugovora za izvođenje radova u MZ Konjodor i MZ Lubarda. U MZ Konjodor, a prema potpisanom ugovoru, izvršiće se rekonstrukcija i modernizacija nekategorisanog putnog pravca Konjodor-Tromeđa ukupne vrijednosti 89.524,00 KM i u MZ Lubarda sanacija i modernizacija raskrsnice Eminići-Abdići vrijednosti 30.773,59 KM.

„Radovi na ovim projektima zavisice od vremenskih prilika ali ja vjerujem da će biti završeni u što kraćem roku. Završetkom ovih projekata značajno će se poboljšati uslovi života u ovim dijelovima naše općine. U općini Bužim trenutno se radi na nekoliko projekata putne komunikacije i ubrzo će u skoro svim zaseocima u mjesnim zajednicama na području cijele Općine biti završeni započeti projekti, a već uveliko radimo na pripremi sličnih projekata za narednu građevinsku sezonu“, istakao je načelnik općine Bužim Mersudin Nanić nakon potpisivanja ugovora.



U ELKASOVOJ RIJECI SVEČANO OTVOREN NOVOASFALTIRANI PUT

Načelnik općine Bužim Mersudin Nanić zajedno sa predsjednikom građevinskog odbora Osmanom Haralčićem i članom građevinskog odbora Ibrahimom Haralčićem, uz prisustvo od preko 100 mještana i gostiju, danas su presijecanjem vrpce svečano pustili u upotrebu novoasfaltirani put u Mjesnoj zajednici Elkasova Rijeka, a radi se o putu "Buljubašići-Haralčići-Šakonjići", dužine 980 metara.



Ukupna vrijednost izvedenih radova iznosila je 170.180,45 KM, a projekat je sufinansiran po principu "Marka građani-marka Općina". Izvođač radova bila je domaća bužimska firma "Kov-Grad" Bužim.

"Ove godine izgradili smo i rekonstruisali preko 20 kilometara puteva i nastavice i iduće godine bez obzira da li je izborna ili neizborna godina. Zadovoljstvo mi je što danas mogu podijeliti sreću, radost i zadovoljstvo mještana zaseoka "Buljubašići-Haralčići-Šakonjići", jer je ovaj put za njih od izuzetne važnosti", kazao je načelnik općine Bužim Mersudin Nanić.



Nanić je istakao da je novoizgrađeni put veoma bitan za mještane i najavio da će u narednom periodu biti izgrađeno još mnogo putnih komunikacija na području čitave općine.

Prema riječima mještana, koji su povodom završetka radova organizirali i veliku svečanost, kvalitetna putna komunikacija u potpunosti mijenja životne uvjete na ovom području i značajno olakšava život mještana ova tri zaseoka koja su zbog udaljenosti i makadamskog puta do sada bila relativno izolovana. Sada je stanje potpuno drugačije i dolazak do centra općine Bužim, kao i susjednih zaseoka je znatno brži i olakšan što je najveća blagodan za same mještane, te se na kraju zahvalili općinskom načelniku što je prepoznao potrebe pomenutih zaseoka, kao i što vodi računa i o ostalim zaseocima kada su u pitanju infrastrukturni projekti na području općine Bužim.



ASFALTIRAN PUT "RAČIĆI" U MZ VAROŠKA RIJEKA

U mjesnoj zajednici Varoška Rijeka, u naselju Račići izvršena je rekonstrukcija i asfaltiranje nekategorisanog puta "Račići". Vrijednost izvedenih radova je 17.927,45 KM, gdje zajedničkim sredstvima učestvuju građani i Općina Bužim. Općinski načelnik Mersudin Nanić posjetio je navedeno naselje te se na licu mjesta uvjerio u realizaciju ovog, za mještane značajnog projekta. Mještani su zadovoljni sa onim što je urađeno. Ističu da put mnogo znači, da su na ovo čekali, te su zahvalili svima koji su učestvovali u realizaciji ovog infrastrukturnog projekta. Općinski načelnik već uveliko radi na pripremi sličnih projekata i za narednu građevinsku sezonu.



ASFALTIRAN PUT "ISAKOVIĆI" U MZ BUČEVCI

U mjesnoj zajednici Bučevci uspješno je asfaltiran nekategorisani puta „Isakovići“ u dužini od 240 m, a vrijednost izvedenih radova su 29.000.00 KM. Novčana sredstva su osigurana po principu "Marka građani-marka Općina", dok je zvođač radova bila bužimska firma "Kov-Grad" d.o.o Bužim. Tim povodom danas je općinski načelnik Mersudin Nanić sa saradnicima posjetio mjesnu zajednicu Bučevci, odnosno zaseok „Isakovići“ te se na licu mjesta i uvjerio u realizaciju ovog, za mještane vrijednog projekta i na taj način podijelio sa njima neopisivu radost. Posebnu zahvalnost mještani koji koriste ovaj put uputili su općinskom načelniku.



NASTAVLJAMO POZITIVNIM PRIČAMA IZ BUŽIMA

Asfaltiran je dio nekategorisanog puta "BAG-STARI GRAD BUŽIM" u dužini od 360 metara (II faza). Projekat su zajedno realizirali građani i općina Bužim, a ukupna vrijednost izvedenih radova iznosi 70.920,25 KM.

Građani su izrazili zadovoljstvo sa izvedenim radovima i naglasili da ako Bog da u 2021.godini planiraju da zajedno sa općinom okončaju i treću fazu, te na taj način završe u potpunosti ovaj projekat kojeg su pokrenuli prije nekoliko godina. Općina Bužim u narednom periodu i dalje će nastaviti zajedno sa svojim građanima, realizaciju ovog i ostalih projekata na području svih mjesnih zajednica.



HOR GAZIJA PREDSTAVIO SPOT ZA PJESMU “VOLJENI”, ZELE LIPOVAČA AUTOR MUZIKE

Hor duhovne muzike i sevdaha Gazija iz Bužima objavio je novu pjesmu “Voljeni” sa albuma “Ljubav beskrajna”, izdanog u Hayat produkciji Sarajevo.

Autor muzike je Sead Zele Lipovača, frontmen grupe Divlje jagode, a tekst je napisao Emin Grošić.

Spot za ovu pjesmu je sniman na atraktivnim lokacijama austrijskih Alpa i dijelom u kanjonu rijeke Une u režiji i montaži Vahidina Veladžića, dok je scenarij napisao Muhamed Berbić.

Ovaj videouradak govori o ljubavi prema Bogu, ali i potrazi za univerzalnom ljubavlju.

“Snimanje je bilo poprilično zahtjevno, pogotovo kad se uzme u obzir lokacija i vremenski uvjeti, ali smo zadovoljni postignutim. To mogu zahvaliti dobroj pripremi snimanja, prelijepoj lokaciji, našim saradnicima u dijaspori, kao i Zeletu koji je napravio ovako dobru pjesmu, a Gazije otpjevali”, kazao je Veladžić.



BZK „PREPOROD“ BUŽIM DOBIO NOVO RUKOVODSTVO, AMIR SIJAMHODŽIĆ NOVI PREDSDJEDNIK

Na sjednici Skupštine BZK „Preporod“ Bužim održane 14.03.2020. godine u amfiteatru Islamskog kulturnog centra Bužim, 38 prisutnih članova društva osim usvajanja Statuta i izbora novog rukovodstva, razmatrao je i Izvještaj o radu sa finansijskim izvještajem za 2019. godinu.

Sjednicom je predsjedavao dosadašnji predsjednik Muhamed Kržalić, koji je u prvom dijelu podnio izvještaj o radu za proteklu godinu, kao i za svih prethodnih 7 godina koliko je vodio bužimski Preporod.

Kako je rekao ono na što je posebno ponosan je činjenica da su iz Bužima često odašiljane pozitivne slike putem elektronskih i printanih medija, a Bužim, njegovi umjetnici i kulturni djelatnici stavljeni na mapu značajnih kulturnih dešavanja u Bosni i Hercegovini.

Ono što je posebno bitno napomenuti je podatak da je BZK Preporod Bužim u proteklih 7 godina kao izdavač stao iza 14 objavljenih knjiga, čime je definitivno postao stup kulturnog života općine Bužim.

Novi predsjednik Amir Sijamhodžić, dugogodišnji aktivista u oblasti kulture, profesor, intelektualac i autor možda najbitnijih djela izdanih u novijoj historiji općine Bužim, istaknuo je da će i u narednom periodu

BZK Preporod Bužim građanima općine Bužim nuditi sadržaje iz domena kulture, trudeći se da to budu sadržaji prikladnog umjetničkog i akademskog nivoa, te sadržaji koji će oplemenjivati i kultivirati naše sugrađane različitih uzrasta, kvalifikacija i usmjerenja.



SVETINJA SVJETLOSTI

I tačno u podne, dok ezani pozivaju bogobožne na sedždu, voda Svetinje naglo poteče i obrušava se niz sedranu stijenu čineći prekrasan slap sjedinujući se sa vertikalnim svjetlosnim snopovima u čarobnom zelenom prizoru.

Ovdje je za sve ljude na duhovnom putu, naročito mjesto za molitvu i očitovanje Božije Jedinosti.

Postepeno nakon izvjesnog vremena, taman toliko koliko traje jedna molitva voda polako presahnjuje, dolinom zavlađa mir koji u zraku pamti napetost u iščekivanju novog dokaska vode u skladnim ritmovima.

Pričali su davno da je na ovom mjestu neki Tajanstveni šejh od hrastovih talpi sa Ćorkovače sagradio tekiju i da je ona za nedugo zapaljena u Latasovoj odmazdi. Zbunjeni ašici nisu znali zbog kakve krivice je umorena ova duhovna praksa slavljenja vode i svjetlosti.

Ali i dalje ostade Božiji znak, ovu vodu i ovu svjetlost niko sem Ljubljenog nemože zaustaviti, Svetinja

i dalje nastavlja svoja ritmička kruženja sve do kraja vremena u beskrajnim horizontima zelenog svemira.

Veliki znalci su tvrdili da je njena voda ljekovita, valjda za sve bolesti, a posebno onu bolest kada insan nemože da osjeti i doživi svjetlost.

Legende dalje govore da je slijepa djevojka nakon uzimanja abdesta na slapovima Svetinje pripremajući se za molitvu doživjela katarzu svjetlosti i divnim čudom, odredbom svoga Gospodara progledala.

Isto tako vilinski konjici nadlijetaju vrbove krošnje tražeći da se sjedine sa svjetlom i vodom, dok u stranama pastiri sviraju sjetne melodije na rikaljikama napravljenim od johove kore.

Ko ovdje malo bolje poslušaj, može čuti tihi šapat Tajanstvenog šajha: „Ja sam oblikom kaplja, ali sadržinom more... Utonuo sam u svjetlost pojava božanstva...“

Ko sanjam ja kako bosonoge krajiške djevojke razgrću mednu rosu sa majskih livada i žurno zahvataju kapljice vode sa mlinskih točkova u tihoj žudnji da im se nakon abdesta lica bijelim nurom sjaju.

A one u šarenim aladžama nurom okićene, prema starim običajima crvenim i žarkim ognjem pokušavaju da iz duša i avlija otjeraju opake zmajeve i aždaha.

I ovog proljeća radosni horoz na tarabi ranom zorom najavljuje krajiške omahe i karneval svijetla i vode u pitomoj zelenoj dolini nadomak srednjovjekovnog grada Čava.

Smjenjuje se neprestalno huk nadolazeće vode koja klobuča iz zemljine tmine sa snopovima svjetlosnih zdanja, kao da je baš ovdje hazreti Hidr ostavio svoje najljepše znakove.

I tako od davnih ilirskih vremena dobri ljudi svih svjetonazora dolaze ovdje i u bardake zahvataju kapljice Svetinje radi berićeta i dobrog zdravlja svojih najdražih.



OTVORENA IZLOŽBA RADOVA HALIDE EMRIĆ U BIHAĆU

U četvrtak, 4. juna, u Gradskoj galeriji Bihać otvorena je izložba keramike „Una iz mog sna” autorice Halide Emrić, a postavljenu izložbu poklonici umjetnosti imaju priliku pogledati do 18. juna.

Kolekcija keramike „Una iz mog sna“ naziv je izložbe kroz koju umjetnica Emrić priča priču o Uni, ali i bosanskoj kulturnoj baštini iz srednjovjekovnog perioda.

Tokom 15 godina umjetničkog rada Halida Emrić stvorila je na desetine hiljada predmeta, a tek mali dio izložen je u Gradskoj galeriji Bihać. Prvu izložbu u rodnom Bihaću Halida Emrić je imala 2007. godine, a tokom svog stvaralačkog perioda imala je preko 50 izložbi u BiH i svijetu.

Halida Emrić jedna je od rijetkih žena na prostorima BiH koja je svoj život posvetila govoru gline i terakote.

Halida Emrić je rođena 1965. godine u Bihaću gdje je završila osnovnu i srednju školu. Dizajnerka je umjetničke keramike. Članica je Udruženja likovnih umjetnika primjenjenih umjetnosti Bosne i Hercegovine (ULU-PUBiH). Izlagala je na preko 50 samostalnih izložbi u Sarajevu, Bihaću, Tuzli, Ljubuškom, Zvorniku, Srebrenici, Travniku, Vitezu, Cazinu, Ključu, Bugojnu, Beču, Istanbulu, Klagenfurtu, Ljubljani, Kastavu, Buzetu, Bosanskoj Krupi, Jajcu, Goraždu...



QUALITAS OCCULTA IZLOŽBA SEADA EMRIĆA U LJUBLJANI



U galeriji EF Univerziteta Ljubljana, 07. jula 2020. godine postavljena je izložba QUALITAS OCCULTA bužimskog autora Seada Emrića.

O Emricevom umjetničkom opusu likovni kritičar Igor Popović iz Zadra je napisao:

“Sead Emrić je slikar čiji se interes ne zadržava na interpretaciji stvarnosti. Umjetnik ovdje radi nešto nadasve hrabro i u osnovi paradoksalno: uspostavlja predio slike kao nešto izdvojeno od stvarnosti. Rub slike, ponekad dvostruk, ponekad trostruk, predstavlja tu granicu koja ne dopušta da stvarnost prodre u svijet »umjetničkog«. Ono umjetničko je prepoznato kao pojavljivanje simbola, kao jezik i kao izraz. Sead Emrić je na tragu upute koju je u 20. stoljeću o biti umjetnosti ponudio Paul Klee: «Umjetnost ne oponaša vidljivo, ona čini vidljivim.» To je, zapravo, sve što Sead Emrić nudi na svojim platnima: čini vidljivim ono što leži izvan stvarnosti i što samo istinski

umjetnik može dosegnuti, a ipak, rijetki u tome ustraju do kraja. Tom najvažnijem nasljeđu moderne umjetnosti u potpunosti pripada Sead, što je vidljivo iz svake njegove slike. Umjetnik se ovdje »igra na rubu«, a da nikad ne upadne u ono banalno, već viđeno ili onu rutiniranu zanatsku multi-produkciju. Ovdje je na djelu začuđujuća imaginacija prebogata idejama. Svaka slika za sebe izazov je za interpretaciju. Oko skače s detalja na detalj, vođeno simbolima, labirintima ritma i tonskim skalama boja. Ova umjetnost je prije svega hrabro ustrajanje na pojavljivanju osobnog unutarnjeg svijeta...”

ODRŽANA PROMOCIJA KNJIGE “PAMTI BOŠNJAČE” AUTORICE ELMEDINE MUFTIĆ

U velikoj sali JU “Centar za kulturu, sport i informisanje” Bužim uz poštovanje epidemioloških mjera u organizaciji Udruženja dobitnika najviših ratnih priznanja i odlikovanja općine Bužim a u sklopu manifestacije “Slobodarski dani viteškog grada Bužima 2020” održana je promocija knjige “Pamti Bošnjake” autorice Elmedine Muftić.

Radi se o drugoj knjizi ove autorice kojom ona pokušava probuditi uspavanu svijest Bošnjaka i podsjetiti ih kako je bitno pamtiti prošlost i hrabrost onih koji su sve činili da bi mi imali sretnu sadašnjost i sigurnu budućnost.

O ovoj, vrlo vrijednoj knjizi, pored autorice, kao promotori, govorili su i Fikret Kauković, Sead Jusić i Harun Hodžić, dok je samu promociju, moderirao Sead Emrić.

Tekstovi o Crnim labudovima i 505. Bužimskoj viteškoj brigadi imaju posebnu snagu kao i drugi tekstovi vezani za snagu majki Bošnjakinja.

– Ovu knjigu pisala sam iz potrebe da generacijama koje dolaze ostavim jedan podsjetnik ko su, šta su, odakle su i kome pripadaju naši heroji, istakla je Elmedina Muftić. Vjerujem kako će ona bar malo doprinijeti da se neki događaji i ljudi ne prepuste zaboravu, kako bismo učili iz historije i imali uzore prema kojim ćemo se ponašati u budućnosti. Mi nismo samo narod kojeg stoljećima ubijaju u genocidima nego smo narod koji rađa najčasnije, najhrabrije, najponosnije i najdostojanstvenije sinove. Željela sam da na jedan način, onako kako ih ja doživljavam, opišem devet heroja odbrambeno oslobodilačkog rata u BiH 1992.-1995. godine, devet njih od stotinu hiljada drugih koji su isto kao oni voljeli svoju zemlju Bosnu i Hercegovinu. Pokušala sam od zaborava otrgnuti i one obične ljude koje ponekad ne prepoznamo na ulici, one mladiće koji su kao maloljetnici stali odbranu svoje domovine. Takvima ova zemlja duguje najviše.

Molim Allaha s.v.t.a. u čijoj je moći moj život i moja smrt, neka moj život učini kurbanom moje Domovine, a kada mi nastupi čas povratka Njemu, neka me učini šahidom (svjedokom) opstanka Islama, Bosne i Bošnjaka. Jer ja bez Bosne živjeti ne umijem!



ODRŽANA PROMOCIJA KNJIGE “GRLJEVAC” AUTORA HAMZE VELADŽIĆA

U Bužimu je u sklopu manifestacije “Slobodarski dani viteškog grada Bužima 2020” upriličena promocija knjige “Grljevac” autora Hamze-Mehe Veladžića.

Organizator je bila BZK “Preporod” Bužim, a promocija je održana u velikoj sali JU “Centar za kulturu, sport i informisanje” Bužim.

U ime organizatora predsjednik BZK Preporod Bužim Amir Sijamhodžić je naglasio da pojavom knjige Grljevac, ali i svih ranije objavljenih knjiga, Hamzu

Veladžića pored u red „vitezova rata“, s pravom možemo svrstati i u red „vitezova mira“. U one iskrene patriote i kulturne i duhovne pregaoce koji nakon branjenja i jačanja svoje države i lokalne zajednice „oružjem u ratu“, isto to čine „perom i tintom u miru“.

O knjizi su govorili promotori Elmedina Muftić, Safet Husić i Agan Elkasović, dok je uvodničar bila Naila Elkasović-Abdić.

Na samom početku prisutnima se obratio i uputio čestitku autoru načelnik općine Bužim Mersudin Nanić koji je naglasio bitnost podrške pisanoj riječi, posebno kada je u pitanju tematika teškog vremena iz odbrambeno-oslobodilačkog rata 1992-1995. godine.

O ulozi tadašnjeg političkog vrha Bužima u donošenju pravovremenih odluka za suprotstavljanje ideji formiranja i proglašenja AP Zapadna Bosna govorio je Izet Ljubijankić.

Promotori Safet Husić i Agan Elkasović govorili su o samim bitkama za Grljevac i položaju koji strateški nije smio biti izgubljen.

Recenzent knjige Elmedina Muftić govorila je o stradanjima Bošnjaka kroz historiju, ali i njegovog nepobjedivog duha, emotivno se dotičući 505. viteške brigade, generala Izeta Nanića i šehida 505. Viteške brigade. Na kraju se prisutnima obratio i sam autor Hamza Veladžić, koji je objasnio šta ga je motivisalo da napiše ovu knjigu

Knjiga govori o ratnim dešavanjima u reonu brda Grljevac a priča je o borcima iz Velike Kladuše i Bužima. Poslije prve knjige koja je nosila naziv „Kumarica“ ovo je drugo Hamzino djelo.

Kao i u prvom slučaju namjera je ne zaboraviti velike ratne bitke ali i hrabre mladiće koji su branili svoju zemlju. Da bi što vjerodostojnije predstavio tadašnja ratna dešavanja, Veladžić je godinama prikupljao građu.

Knjiga “Grljevac” autora Hamze Veladžića govori o ovom mjestu koje je kroz svoju dugu historiju bilo poprište velikih i krvavih događaja, koji su uglavnom imali prizvuk vjerskog i nacionalnog karaktera, kao u slučaju Srpskog ustanka 1875. godine i nemilih događaja u Drugom svjetskom ratu. U Odbrambeno-oslobodilačkom ratu “Grljevac” postaje sinonim otpora u Zborištu, jer su tu pale prve žrtve, ali i mjesto na kojem se desila jedna od ključnih bitaka za ovaj prostor u proteklom ratu.



OTVOREN SLIKARSKI OPUS “SUMMA BOSNIACA” AUTORA SEADA EMRIĆA

U sklopu obilježavanja manifestacije „Slobodarski dani viteškog grada Bužima“ sinoć je u Islamskom kulturnom centru otvorena dugo očekivana izložba slika likovnog umjetnika Seada Emrića pod nazivom „Summa Bosniaca“. Prigodnim obraćanjem u ime organizatora obratili su se Eniz Veladžić, direktor Islamskog kulturnog centra Bužim i Amir Sijamhodžić, predsjednik BZK “Preporod” Bužim. Kako su naglasili izložba je simbolično otvorena na ovaj datum jer je to godišnjica ratne izložbe Seada Emrića koja je bila 1994. godine postavljena u Bihaću, a koju je lično otvorio komandnat Izet Nanić nakon vođenja operacije oslobađanja Pećigrada.



Riječ je o umjetniku koji svoju inspiraciju pronalazi u historiji Bosne. Tematski istražuje bosansku tradiciju, oblikujući je u slikarsko djelo. Sead Emrić je u minulom vremenu ucrtao vlastiti izraz i umjetnički fundus, kako u Bužimu, tako i Krajini i BiH. Njegovi radovi bili su izloženi na zidovima mnogih galerija kako u BiH tako i van nje. Likovni kritičari, što vrijedi naglasiti, ubrajaju ga u sami vrh apstraktnih umjetnika u zemlji i svijetu.

Dobitnik je brojnih nagrada i priznanja počev od Colegium Artisticuma, domaćih i regionalnih umjetničkih smotri, sve do Beča, Istanbula, Dohe ili Sao Paola.

Kad je riječ o njegovom doprinosu kulturnom životu općine Bužim, Sead je jedan od aktera pokretanja manifestacije Slobodarski dani viteškog grada Bužima, autor je grba općine Bužim, grba NK VITEZ, grba Cazinske medrese, amblema Čete za specijalne namjene “Hamza”, urednik je mografije Bužim kroz vrijeme, autor tekstova za film Bužim – ponosni bosanski grad, bio je direktor Informativo-kulturnog centra Bužim, pokretač Radija Bužim, dugogodišnji predsjednik Preporoda, osoba koja je najzaslužnija za projekat izgradnje škole Lotos i ljljan u Varoškoj Rijeci, za proglašenje Starog grada Bužim i Drvene džamije nacionalnim spomenicima.

ODRŽANO OSMO BUŽIMSKO KNJIŽEVNO KAZIVANJE I OSMI BUŽIMSKI LIKOVNI SALON

U velikoj sali Centra za kulturu, sport i informisanje sinoć je u okviru ovogodišnje manifestacije “Slobodarski dani viteškog grada Bužima 2020” održano Osmo bužimsko književno kazivanje i Osmi bužimski likovni salon. Na ovogodišnjem likovnom salonu svoja umjetnička djela izlagalo je 5 umjetnika u različitim tehnikama, Ferida Kovačević, Hazer Emrić, Sead Emrić, Nedžib Vučelj (izložena djela posthumno), Halida Emrić. Za uvodnu riječ i ulogu umjetničkog kritičara bio je zadužen Sead Emrić. Prisutnima se obratio predsjednik BZK Preporod Bužim Amir Sijamhodžić a zatim i načelnik općine Bužim Mersudin Nanić.

Osmi bužimski likovni salon je kratkim obraćanjem otvorio predsjednik organizacionog odbora manifestacije Edham Eminić. U sklopu Osmog bužimskog književnog kazivanja prisutni su slušali Emina Grošića, Nejru Bešić, Dževada Ponjevića, Safeta Emrića, Amira Sijamhodžića, Lejlu Šahinović, Aminu Šekić i Fehimu Balkić. Nakon toga uručene su i nagrade i proglašeni najuspješniji radovi pristigli na javni konkurs za najbolju neobjavljenu pjesmu o generalu Izetu Naniću za učenike osnovnih i srednjih škola. Pjesme je pročitala Naila Elkasović Abdić.

U kategoriji osnovnih škola nagrađeni su:

Medina Ćordić (prvo mjesto)

Erna Bunić (drugo mjesto)

Ehlimana Bajrić (treće mjesto)

U kategoriji srednjih škola najuspješniji su:

Dalila Aldžić (prvo mjesto)

Sumeja Tabaković (drugo mjesto)

Sara Kovačević (treće mjesto)



HOR GAZIJA PREDSTAVIO SPOT “BUŽIMSKI EZANI”



Grupa mladih entuzijasta i umjetnika, okupljenih oko kultne krajiške grupe Gazije danas su izašli u javnost sa novim projektom. Radi se o spotu pod nazivom “Bužimski ezani” koji je premijerno prikazan danas. Hor duhovne muzike i sevdaha Gazija iz Bužima već skoro tri decenije egzistira i oduševljava svojim nastupima, koncertima i novim projektima koji afirmišu kulturno duhovno naslijeđe i bosansku sevdalinku. Video spot je sniman u ambijentu Starog grada Bužima u režiji i montaži Vahidina Veladžića, dok su scenarij napisali Sead Emrić i Vahidin Veladžić. U rano proljeće 2020. godine u uslovima izolacije izazvane svjetskom pandemijom Gazije su koristile na najkreativniji način skladajući i snimajući novi spot kao podlogu za izvođenje poziva na molitvu, ezana u krajiškoj pitomini Starog grada Bužima.

Projekat Bužimski ezani, hora duhovne muzike i sevdalinke Gazija kreiran je i realiziran u ambijentu Starog grada Bužima koji im je kao kulisa podario mnoge mogućnosti za povratak u staru praiskonsku tradiciju ovog kraja.

Islamska duhovna tradicija u Bužimu egzistira od 1576. godina do danas tačno 444 godine. Prvi ezani su u davnom 16. stoljeću bili učeni upravo sa kula i tabija ovog veličanstvenog arhitektonskog zdanja. Prva bužimska kamena džamija Fethija je sastavni dio bužimske tvrđave i upravo je ona ishodište i centar interesovanja ovih mladih ljudi kako da se na samom izvoru ove duhovnosti nadahnu neprekinutom tradicijom koja već više od četiri stoljeća traje nad Bužimom, cijelom Krajinom, Bosnom i Hercegovinom i šire.

U svom scenskom prikazu Gazije su nastojali da prepoznaju i afirmišu sve one činjenice koje su ostale u tradiciji ovog naroda a vezane su za one čarobne trenutke iščekivanja ezana za početak ramazanskih iftara.

Na oronulim zidinama Stare kamene džamije Fethije u Bužimu, mujezini Gazija su na simboličan način proučili ezane i dali jasan znak da se iz ove džamije kasnije ezan proširio na cijelu Karajinu i da je upravo ova džamija u bužimskoj tvrđavi biti rasadnik mnogih džemata koji će kasnije rezultirati i osnivanjem brojnih medresa u Krajini te u moderno doba i Islamskim fakultetom u Bihaću.

Razdragani momci, u službi tradicije u bosanskim nošnjama nose i bajrak sa kojim žele da ukažu na slavnu odbranu grada Bužima od agresora pod upravom alemdara Ahmeda Bajrektarevića iz 1737. godine. Bužimski ezani u izvedbi Gazija su se stopili sa trešnjevim beharom i zvukovima koje daje priroda stvarajući neviđeni sklad.

PROMOVISANA MONOGRAFIJA O STOGODIŠNJEM POSTOJANJU OSNOVNE ŠKOLE BUŽIM

U Povodu velikog jubileja, 100-u godina od osnivanja OŠ Bužim u organizaciji BZK "Preporod" Bužim " i suorganizaciji Centra za kulturu, sport i informisanje" Bužim uz poštovanje mjera zbog pandemije Covid-19 u velikoj sali Centra za kulturu Bužim, promovisana je monografija „100 godina OŠ Bužim (1920-2020)“ autora Amira Sijamhodžića.

Kako je navedeno na promociji, riječ je o jednom od najznačajnijih poduhvata kada je u pitanju izdavačka djelatnost na području USK. O monografiji su govorili promotori hafiz dr. Rifet Šahinović i Mehmed Pargan, književnik i publicista, kao i sam autor Amir Sijamhodžić, dok je

voditeljica bila Naila Elkasović. Na samom početku prisutne je pozdravio te u ime JU Centar za kulturu, sport i informisanje Bužim uputio čestitke autoru i OŠ Bužim V.D. direktor Vahidin Veladžić.

Osvrte iz monografije su čitale Lejla Šahinović, Jasmina Ičanović i Amina Čatić

Monografija „100 godina OŠ Bužim“, ne otkriva samo činjenice o dugom i uspješnom razvoju ove obrazovne ustanove kroz historiju, nego i sjećanja i uspomene svih generacija koje su kroz nju prošle. Iza sveobuhvatnog prikaza škole i njenog cjelokupnog razvoja kroz monografiju je sedam godina predanog naučno-istraživačkog rada autora Amira Sijamhodžića. Bogato opremljena monografija na 360 stranica uz mnoštvo fotografija, historijskih dokumenata i vrijednih podataka i spoznaja svjedoči o historiji OŠ Bužim. Kroz ovu školu prošle su brojne generacije uspješnih učenika koji su postizali izvrsne rezultate ne samo u svom gradu i kantonu već i širom svijeta. Monografija će sve učenike, učitelje ali i ostale uposlenike podsjetiti na dio života provedenog u ovoj školi koja im je nakon sticanja prvih iskustva i saznanja pomogla da se izgrade kao ličnosti i postanu pokretači različitih društvenih aktivnosti. Istovremeno monografija nam pokazuje da je OŠ Bužim i danas jedna od izuzetnih obrazovnih ustanova ne samo u kantonu već i široj društvenoj zajednici.

ODRŽAN KONCERT KLASIČNE MUZIKE U IZVEDBI ODJELJENJA MUZIČKE ŠKOLE



U Bužimu je juče održan koncert klasične muzike u izvedbi učenika Muzičke škole Bihać, područnog odjeljenja Bužim. Koncert je održan u organizaciji JU "Centar za kulturu, sport i informisanje" Bužim i Muzičke škole Bihać, odjeljenje Bužim.

S obzirom na aktualnu situaciju sa pandemijom korona virusa koncert je emitovan uživo online, a događaju su u skladu sa pravilima mogli prisustvovati samo roditelji.

Na samom početku obratio se umjetnik Sead Emrić, inače referent za kulturu općine Bužim koji je govorio o bitnosti postojanja odjeljenja muzičke

škole u Bužimu, te njenom utjecaju na kulturni život općine Bužim.

Nakon toga je uslijedilo pojedinačno izvođenje kompozicija učenika na instrumentima klavir i gitara.

OD SINOĆ RAMAZANSKI TOP SA STAROG GRADA U BUŽIMU OZNAČAVA KRAJ POSTA I POČETAK IFTARA

Od ovog Ramazana se po prvi put nakon više decenija oglasio pucanj iz topa sa Starog grada Bužima i na taj način označio vrijeme prvog iftara u ovom ramazanu za sve građane općine Bužim.

Ramazanski top posljednjih godina postao je prava atrakcija širom gradova BiH, a od ove godine i u Bužimu imamo priliku osjetiti čari ramazana i na ovaj način.

Brojni Bužimljani su se okupili na Starom gradu iznad Bužima kako bi pomogli instaliranju topa i prisustvovali prvom pucnju, a uspješna aktivacija izazvala je radost kod sviju.

U tradicionalnoj Bošnjачkoj nošnji mladom Bužimljaninu Abdullahu Dekiću, pripala je čast i zadovoljstvo da prvi pripali fitilj, a već od večeras baklju preuzima iskusni topdžija Hazim Mehić sa Starog grada.


Pored brojnih Bužimljana na Starom gradu, a u iščekivanju prvog pucnja boravio je i općinski načelnik Mersudin Nanić, koji je kazao:

„Posebno sam radostan što će se ove godine sa Starog grada označavati kraj posta i početak iftara ramazanskim topom kojeg smo dobili od Gradonačelnika Grada Sarajeva Abdulaha Skake, kojem se ovom prilikom zahvaljujem na ovom poklonu koji će uljepšati ramazanski post svim vjernicima. Također, želio bih se zahvaliti našim privrednicima koji su se odazvali u akciju kupovine specijalne municije za top. Drago mi je da imamo ramazanski top jer je on tradicija u većini gradova i općina širom BiH“.

Privrednici koji su podržali ovaj projekat Jusic doo, Hamid Latan, Auto kontakt, Kov Grad, Abi comerc, Enex, Walmart kompani, Englomer, Final gradnja, Pleska doo.

ZAVRŠENA REKONSTRUKCIJA ULAZNE KAPIJE I BEDEMSKOG ZIDA STAROG GRADA

Finalizirana je rekonstrukcija ulazne kapije i bedemskog zida Starog grada Bužim. Podsjećanja radi ugovor koji je precizirao ove radove potpisan je u augustu ove godine između općine Bužim i poduzeća “Neimari” d.o.o. iz Sarajeva, a vrijednost navedenih radova je 68,913,00 KM. Radove je u ime firme “Neimari” doo izvršila kao podizvođač domaća bužimska firma “Gradnja final” doo. Kao što se vidi iz priloženih fotografija, ovo je pravo osvježanje za bužimski nacionalni spomenik, i nakon postavljanja rasvjete na gradu, daje istom novi izgled i dimenziju a i funkcionalnost s obzirom da će se ulaznom kapijom moći reducirati nekontrolisan ulazak u nacionalni spomenik. ”Rekonstrukcijom bedemskog zida i postavljanjem ulazne kapije nastavljamo sa zaštitom nacionalnog spomenika. Izgradnja ovog dijela sjevero-zapadnog zida uz sami ulaz na Stari grad stvaraju se bolji sigurnosni uslovi za sve posjetioce. Obzirom na činjenicu da je ostalo još dosta posla na završetku zaštite Starog grada Bužim, uvjeren sam da će se i u narednim godinama nastaviti konzervacija našeg dragulja”.-istakao je načelnik općine Bužim Mersudin Nanić u svojoj izjavi. podsjećanja radi zbog izuzetne vrijednosti, Komisija za zaštitu nacionalnih spomenika proglasila je Stari grad Bužim 2003. godine nacionalnim spomenikom Bosne i Hercegovine. Njegova vrijednost i sada ima težinu, jer se nalazi na sjeverozapadu nadomak Evropske unije što predstavlja izuzetnu šansu za razvoj kulturno-historijskog turizma.



ODRŽAN RADNI SASTANAK NAČELNIKA OPĆINE, MINISTRA POLJOPRIVREDE I POLJOPRIVREDNIH PROIZVOĐAČA OPĆINE BUŽIM



U sali Općine Bužim održan je sastanak u vezi sa prijedlozima i sugestijama za izradu Odluke i Uputstva za ostvarivanje kantonalnih novčanih podrški u primarnoj poljoprivrednoj proizvodnji za 2020. godinu i da bi analizirali suradnju u protekloj godini te dodatno unaprijedili efikasnost te pružanje stručne pomoći poljoprivrednicima, posebno u postupcima koji se odnose na ostvarivanje novčanih podrški.

Na sastanak su pozvani zainteresirane stranke, poljoprivrednici, predstavnici poljoprivrednih udruženja i pravna lica/obrti kojima je osnovna djelatnost poljoprivredna proizvodnja. Sastanku su pored domaćina načelnika općine Bužim Mersudina Nanića prisustvovali Ministar Sulejman Kulenović, službenici ministarstva i općine te poljoprivrednici.

Ministar Kulenović je upoznao prisutne da je dug kantonalnih podrški, prijašnjih godina isplaćen. Poticaji za 2019. godinu isplaćeni su za pravna lica, a za fizička lica će biti isplaćena do kraja februara. U 2020. godini planirano je nešto više sredstava za poticaje. Zahvaljujući dobroj suradnji, Unsko-Sanski kanton, kad je ova oblast u pitanju, ocijenjen je najbolje organiziran na području F BiH. U novu kalendarsku godinu se ulazi sa isplaćenim obavezama, a u narednoj godini nastojat će dodatno olakšati posao farmerima pojednostavljivanjem procedura.

Načelnik općine Bužim upoznao je ministra i prisutne da su poticaji za 2019. godinu sa općinskog nivoa isplaćeni i nova se planiraju za 2020. godinu u istom iznosu od 100 000 KM.

Na sastanku je razgovarano i o problematici u poljoprivrednoj proizvodnji, poticajima kao i trenutačnim aktivnostima i izazovima s kojima se suočavaju poljoprivrednici. Naglašeno je da je poljoprivreda značajna baza za razvoj,

ali uz podršku svih nivoa vlasti. Sugestija poljoprivrednika je da se uradi strategija razvoja poljoprivrede u kojoj će pri izradi učestvovati i sami poljoprivrednici.

Predloženo je formiranje komisije za kontrolu rastera otкупljivača jagodičastog voća i krastavaca kako bi se smanjila zloupotreba. Poljoprivrednici su naglasili i nedostatak novčane podrške za kapitalna ulaganja kao i za proširenje kapaciteta.

Na osnovu navedenog i s obzirom na uvjete koje imamo na području općine Bužim (prirodni resursi, klimatski uvjeti, tradicija u poljoprivrednoj proizvodnji i drugo) primarna poljoprivredna proizvodnja zaslužuje i zahtjeva posebnu pažnju svih relevantnih faktora.

Pri kraju eksproprijacija zemljišta za gradnju Obilaznice u Bužimu: Do sada isplaćeno preko 650.000,00 KM građanima za zemljište

U interesu blagovremenog i istinitog informisanja građana općine Bužim i šire javnosti, a vezano za implementaciju projekta izgradnje dijela magistralne ceste koja prolazi kroz središte općine Bužim, a poznatija u narodu kao „Obilaznica Bužim“, sa zadovoljstvom ističemo da se pomenu ti projekat implementira prema dogovorenoj dinamici i planu, kako je i definisano planom rada i prema dogovorima Vlade Federacije BiH, JP Ceste Federacije BiH i općine Bužim.

Krajem 2019. godine javnost smo informisali da je započet postupak rješavanja imovinsko-pravnih odnosa, odnosno eksproprijacija zemljišta potrebnog za izgradnju saobraćajnice – Obilaznice u Bužimu.

U skladu sa rokovima i propisima, organ uprave u saradnji sa JP Ceste Federacije BiH, paralelno rješava i pitanja zaključenja sporazuma o isplati nakanda za eksproprijirano zemljište, a prema dokumentaciji već je izvršena isplata u visini od 650.000,00 KM, što procentualno čini oko 50% isplate od potrebnog iznosa.

U narednom periodu, a prema planu rada, do kraja mjeseca februara planirano je zaključenje sporazuma za ostatak eksproprijiranih nekretnina, a što znači da će i isplata sredstava biti izvršena u rokovima i prema planu.

Pored navedenog ubrzano se radi na pripremi ostale dokumentacije koja će biti potrebna za raspisivanje tender za ovaj projekat.

Želimo se zahvaliti svima onima koji su dali doprinos implementaciji ovog višedecenijskog projekta, direktnim učesnicima, i to Vladi Federacije BiH i JP Ceste Federacije BiH, a posebno vlasnicima zemljišta, obzirom da su velikodušno prihvatili ovaj projekat bez obzira na činjenicu koliko su obeštećeni u konkretnom slučaju.

Također, ovim informišemo naše građane i najavljujemo tokom ove godine i početak građenja treće završne faze ovog dijela saobraćajnice - Obilaznice u Bužimu.

POTPISAN SPORAZUM SA UDRUŽENJEM POVRTLARA OPĆINE BUŽIM

Načelnik Općine Bužim Mersudin Nanić potpisao je danas sporazum sa predsjednikom Udruženja "Povrtlara" Šerifom Burzićem kojim se implementira projekat proljetne sjetve i nabavke presadnica za članove ugovor udruženja.

Potpisanim sporazumom u 100% iznosu se finansira nabavka kukuruza, krompira i graha sa zaštitinim sredstvima iz sredstava odobrenih Odlukom Vlade USK-a i 50% troškova za nabavku presadnica iz Programa novčane podrške općine Bužim za poljoprivrednu proizvodnju.

-“U ovim teškim vremenima moramo hitno djelovati i pomoći poljoprivrednim proizvođačima da na vrijeme završe proljetnu sjetvu i pripreme presadnice za svoje plastenike. Vjerujem da će sredstva od 98.000,00

KM pomoći članovima Udruženja povrtlara općine Bužim da zasiju sve planirane površine i tako održe i povećaju svoju proizvodnju. Pored ovih sredstava Udruženju povrtlara će biti uplaćena sredstva i za redovne aktivnosti udruženja”. – naglasio je načelnik općine Bužim Mersudin Nanić nakon potpisivanja ovog sporazuma.



MINISTAR DEDIĆ U POSJETI BUŽIMU

Federalni ministar poljoprivrede, vodoprivrede i šumarstva Šemsudin Dedić započeo je juče dvodnevni obilazak općina i gradova Unsko-sanskog kantona. Podsjetimo da je danas završen javni poziv Federalnog ministarstva upućen upravo općinama i gradovima, a koji se odnosi na program podrške proljetnoj sjetvi. Radi se o jednoj od mjera Vlade Federacije BiH za ublažavanje posljedica pandemije koronavirusa u poljoprivredi. Uz poštivanje mjera i naredbi o socijalnoj distanci i upotrebi maski, u sali općine Bužim Ministar Dedić je zajedno sa načelnikom općine Bužim Mersudinom Nanićem održao sastanak sa predstavnicima poljoprivrednih proizvođača i poljoprivrednim proizvođačima sa područja općine Bužim.



Na samom početku prisutnima se obratio općinski načelnik Mersudin Nanić koji je poželio dobrodošlicu ministru i poljoprivrednicima, te izrazio nadu da će poljoprivredna proizvodnja u ovoj situaciji biti unaprijeđena i dobiti mjesto koje je oduvijek zasluživala. Kako je naglasio Dedić, prema preliminarnim podacima u čitavoj Federaciji za podršku proljetnoj sjetvi prijavilo se oko 17 hiljada poljoprivrednika, što je preko osam puta više nego prethodne godine. „Gradovi i općine Unsko-Sanskog kanton prijavili su oko 2.500 korisnika i očekujemo značajno povećanje obrađenih površina u USK. Ohrabruje nas činjenica da su poljoprivrednici u ovom kantonu, ali i u cijeloj FBiH pokazali veliki interes za ovaj program. Ovom prilikom želim poručiti poljoprivrednicima da ovo nije jednokratna mjera, te da već pripremamo sličan program i za podršku jesenskoj sjetvi“, izjavio je Dedić.

ODRŽAN SASTANAK I DRUŽENJE U CILJU OSNIVANJA KROVNOG UDRUŽENJA FRIZERA I KOZMETIČARA USK



U Bužimu su se okupili vlasnici frizerskih radnji i kozmetičkih salona iz USK, s ciljem sagledavanja mogućnosti osnivanja krovnog kantonalnog udruženja. Iako je i ranije bilo sličnih pokušaja, ideja nikad nije realizovana.

Pandemija koronavirusa čvršće je povezala frizere i dodatno učvrstila namjeru osnivanja asocijacije, koja je sinoć i dogovorena, a sve u cilju lakšeg rješavanja problema sa kojima se susreću. Kako je tokom ovog skupa kazano zatvaranje njihovih radnji na nekoliko mjeseci dovelo je u pitanje egzistenciju kako vlasnika tako i uposlenika.

Danas je situacija u mnogim elementima i teža, s obzirom na ekonomske parametre koji su izostali po nastavku rada. Zato, kako smatraju, potrebno je krovno udruženje putem kojeg će moći institucionalno djelovati u pogledu borbe za bolji status i opstanak u veoma složenim okolnostima koje je proizvela pandemija koronavirusa.

Podršku ovoj ideji dala je i općina Bužim na čelu sa načelnikom Mersudinom Nanićem koji je u svom obraćanju naglasio bitnost opstanka malih i srednjih obrta u ovoj teškoj situaciji, te se u tom smislu u skladu sa mogućnostima stavio na raspolaganje.

BUŽIMSKA OBILAZNICA U DVOGODIŠNJEM PLANU RADA CESTA FBiH

Dragi sugrađani, Vama je poznato da sam mandat dobio na prijevremenim izborima 2019. godine. Dobio sam povjerenje i obavezu da vodim našu Općinu ali da i u ime OO SDA Bužim, u fokus svog djelovanja i rada u mandatu posvetim, između ostalog i pitanju izgradnje Bužimske zaobilaznice.

To je ujedno bilo i jedno od izbornih obećanja građanima općine Bužim, ne samo rukovodstva OO SDA Bužim, već i obećanje rukovodstva organa SDA BiH.

S tim u vezi, ovom pitanju posvećena je maksimalna pažnja, pa je putem izabраниh lica SDA BiH u Vladi Federacije BiH u martu 2019. godine, izvršena prekategORIZACIJA do tada regionalne ceste u magistralnu saobraćajnicu, što je automatski značilo preuzimanje projekta na nivo Federacije BiH, te da je provedba pokrenuta i da će biti okončana.

Na čelu tima projekta, kao Općinski načelnik za kratak period mandata, u saradnji sa nosiocem aktivnosti, tj. JP Ceste Federacije BiH, oformili smo tim koji je bio dužan da pripremi projekat i da ga u zadatom roku od jedne godine okonča do faze kada bi bili riješeni svi imovinsko-pravni poslovi, te izvršena uknjižba svih nekretnina u korist državne svojine.

Kako se radilo o veoma složenom i obimnom poslu, priprema projekta je rađena vrlo temeljito i detaljno, te je sve urađeno veoma brzo i kvalitetno. Ova aktivnost, između ostalog, pohvaljena je i od implementatora, JP Ceste FBiH, Vlade Federacije BiH i lično od Premijera Vlade FBiH.

Kvalitetan i predan rad u ovom milionskom i kapitalnom projektu, rezultiralo je da se bez ijednog značajnog problema, u zadanom roku, okončaju imovinsko-pravni poslovi (o obimnosti istog govore podaci da se radilo o trasi saobraćajnice od cca 1.800 metara, da je obuhvaćeno cca 160 parcela i oko 120 lica vlasnika zemljišta sa različitim pravom na nekretninama, te da je za navedeni posao vlasnicima zemljišta isplaćeno nešto više od 1.000.000,00 KM).

Na svoje lično zadovoljstvo, a i zadovoljstvo svih nas, informišem javnost da je Obilaznica Bužim sada sastavni dio magistralnog puta Bosanska Otoka – Velika Kladuša, te da se nalazi u dvogodišnjem planu rada JP Ceste Federacije BiH, za implementaciju (podrazumijeva, ne samo izgradnju ovog djela saobraćajnice, nego i poboljšanje uslužnosti saobraćaja i na ostalim dijelovima na ovom potezu, čija je ukupna dužina 57 kilometara).

Naš cilj je, nastaviti i završiti započeto u mandatnom periodu 2020-2024. godina jer Općina Bužim može nastaviti ovim tempom i pravcem samo uz dobru kadrovsku politiku i politiku koju vodi SDA, uz pomoć organa i institucija na čijim mjestima su pozicionirani ljudi privrženi Općini Bužim i njenim građanima.

Stoga, ukoliko Bužimljani na predstojećim izborima budu izabrali isti ovaj tim na čelu Općine Bužim mogu biti sigurni da će ovaj projekat biti nastavljen i uspješno završen. Na zadovoljstvo svih naših sugrađana!



EDIN VUČELJ PROGLAŠEN NAJUSPJEŠNIJIM SPORTISTOM OPĆINE BUŽIM ZA 2019. GODINU

U organizaciji Sportskog saveza Općine Bužim u velikoj sali Centra za kulturu sport i informisanje Bužim održan je izbor i proglašenje najuspješnijih sportista i sportskih radnika Općine Bužim za 2019. godinu. Ove godine za najuspješnijeg sportistu Općine Bužim za 2019. godinu proglašen je svjetski prvak Edin Vučelj, inače član Taekwon-do kluba Asim Bajrektarević – Hamza Bužim. Pored navedenih dodijeljene su i nagrade mladim sportskim perspektivama, kao i nagrade i školskim sportovima za 2019. godinu. Program su u pauzama uljepšale članice Ženskog gradskog hora Bužim i članovi KUD-a Sevdah Bužim, a nakon programa je upriličena zakuska. Za najuspješnijeg sportistu u ženskoj konkurenciji Proglašena je KRUPIĆ NAILA, članica TKD Kluba Fadil Bajrektarević-Gazija iz Vrhovske, koja je u 2019 godini učestvovala na velikom broju međunarodnih takmičenja. Državna je prvakinja u svojoj kategoriji. Učestvuje na Evropskom prvenstvu u Taekwon-dou u Sarajevu i na Svjetskom prvenstvu u Njemačkom Inzelu gdje osvaja 2.mjesto u kategoriji borbe -50 kg čime postaje Svjetska viceprvakinja. Radi kao pomoćni trener u klubu Gazija. Majstor Taekwon-doa II Dan.



Za najuspješnijeg sportistu u muškoj konkurenciji u 2019. godini žiri je proglasio ŠAHINović AMELA, člana Taekwon-do kluba „Asim Bajrektarević Hamza“ Bužim, majstora Taekwondoa 1. Dan, učesnika Evropskog prvenstva u Sarajevu, Državnog prvaka u svojoj kategoriji. Učesnik Svjetskog prvenstva u Taekwon-dou gdje je osvojio 3.mjesto u kategoriji juniori borbe +75 kg.

ODRŽAN TURNIR U ŠAHU U SKLOPU MANIFESTACIJE “MUNJA '93”



U sklopu obilježavanja bitke “Munja '93”, u organizaciji Saveza za sport i rekreaciju invalida općine Bužim održan je turnir u šahu. Na samom uvodu prisutne je pozdravio i poželio sportsku sreću predsjednik Saveza Asim Bajrić. Učešće je uzelo 10 igrača a prvi potez je odigrao načelnik općine Bužim Mersudin Nanić zajedno sa na-



jstarijim igračem Šerifom Cosićem, te na taj način proglašio turnir otvorenim. Nakon završetka turnira proglašen je poredak i nagrađeni najbolji igrači. Prvo mjesto osvojio je Šerif Ćosić, drugo je pripalo Semiru Odobašiću a treće Remetić Nijazu.

PREDSTAVNICI TKD KLUBA FADIL BAJREKTAREVIĆ “GAZIJA” SA GOSTIMA KOD NAČELNIKA OPĆINE



U programu obilježavanja Dana općine Bužim sutra se održava 4. Juniors Bosnia open turniru u Taekwondo-u, te je tim povodom načelnik općine Bužim Mersudin Nanić u svom kabinetu primio predstavnike TKD”Fadil Bajrektarević-Gazija” i goste iz R Hrvatske iz TKD “Shark” Dubrovnik, koji po drugi put zaredom učestvuju na ovom turniru u Bužimu.

Načelnik je poželio dobrodošlicu našim gostima iz susjedne Hrvatske, te im poželio puno sportske sreće i uspjeha na sutrašnjem turniru. Posebno je naglasio da Općina Bužim uvijek stoji na raspolaganju svim sportskim kolektivima sa područja naše općine i da će sve njihove aktivnosti pomagati

u skladu sa mogućnostima ali i rezultatima koji su očekuju u ovoj godini na takmičenjima u zemlji i inostranstvu. Predstavnici klubova su izrazili zahvalnost načelniku Naniću što je upriličio ovaj susret i što daje podršku u organizaciji sportskih takmičenja.

ZAVRŠENO UTOPLJAVANJE OBJEKTA GDJE JE SMJEŠTEN NK VITEZ BUŽIM



U centru Bužima ovih dana završeni su radovi na utopljanju i estetskom uređivanju zgrade u kojoj boravi i radi NK Vitez Bužim.

Zgrada se nalazi u samom centru Bužima, te je dosadašnjim izgledom odudarala od cjelokupnog ambijenta. Zgrada je sada pored estetskog izgleda i utopljena, što će uveliko olakšati funkcionisanje ovog bužimskog kluba.

„Realizacijom ovog Projekta poboljšat će se energetska efikasnost objekta, poboljšati vanjski izgled

objekta, smanjiti ekološka zagađenost, te pored navedenog svakako doprinosi i novim, ljepšim izgledom same naša čaršija. Nastavit ćemo podržavati sve pozitivne aktivnosti i projekte u našoj lokalnoj zajednici, koji su od značaja za naše građane i sportske kolektive. Posebno ističem nesebičnu podršku naših privrednika koji su se uključili u ovu akciju“, kazao je načelnik Nanić.

Radove je financirala Općina Bužim po osnovu Ugovora kojeg su potpisali načelnik općine Bužim Mersudin Nanić i predsjednik NK Vitez Bužim Edham Eminić.

Iz NK Vitez Bužim nisu krili zadovoljstvo urađenim poslom od strane općine Bužim.

Pored utopljanja i estetskog uređivanju zgrade važno je napomenuti da su na zgradi postavljeni reklamni panoi od koji će se dodatno financirati klub.



ODRŽAN 13. MEĐUNARODNI TURNIR U SJEDEĆOJ ODBOJCI



U sklopu obilježavanja 27. Godišnjice bitke “Munja 93” u Sportskoj dvorani Bužim je održan 13. Međunarodni turnir u sjedećoj odbojki. Učešće na ovom turniru je uzelo 6 ekipa i to 4 ekipe iz Republike Hrvatske : KSO SISAK, OKI NOVSKA, OKI MARSONIA te KISO KARLOVAC i dvije ekipe iz Bosne i Hercegovine, OKI BRČKO i KSO BUŽIM.

Na početku turnira učesnicima i prisutnima su se obratili predsjednik Kluba sjedeće odbojke Bužim Nijaz Isaković, te načelnik općine Bužim Mersudin Nanić



koji je nakon prigodnog obraćanja i izražavanja dobrodošlice gostujućim ekipama turnir proglasio otvorenim. Turnir je protekao u fer i korektnoj igri, a poredak ekipa po osvojenim mjestima je bio slijedeći: 1. OKI MARSONIJA, 2. KSO SISAK, 3. OKI BRČKO, 4. KSO BUŽIM, 5. KISO KARLOVAC, 6. OKI NOVSKA. Fair Pley pehar je zauzela ekipa KISO KARLOVAC.

POTPISAN UGOVOR ZA IZGRADNJU SRC “JARAČE” U MZ LUBARDA

U kabinetu općinskog načelnika općine Bužim Mersudina Nanića danas je potpisan ugovor za izvođenje radova na izgradnji Sportsko-rekreativnog centra “Jarače” u MZ Lubarda. Ugovor vrijedan 19.885,00 KM potpisali su izvođač radova d.o.o. “Velić kop” iz Bosanske Krupe i načelnik općine Bužim Mersudin Nanić.

“Svaka lokalna zajednica pokušava da stvara što bolje uslove za bavljenje sportom i njegovo unapređenje na cijelom području općine. Danas smo potpisali ugovor za izgradnju sportskog centra u MZ Lubarda koji će služiti građanima ove mjesne zajednice, a prvenstveno mladima”.-naglasio je načelnik općine Bužim Mersudin Nanić nakon potpisivanja ugovora.



TRI PRVA MJESTA ZA IBRAHIMA DIZDAREVIĆA NA SPORTSKIM IGRAMA PARAPLEGIČARA



Na atletskom stadionu u Zenici održano je Međunarodno otvoreno prvenstvo i XVII sportske igre paraplegičara i oboljelih od dječije paralize Federacije BiH, a u organizaciji Saveza paraplegičara i oboljelih od dječije paralize FBiH.

Učešće na ovim sportskim igrama uzeo je i naš sugrađanin Ibrahim Dizdarević koji je učestvovao u tri atletske discipline u kojima je osvojio i tri prva mjesta. Ukupno je bilo šest atletske discipline, a Ibrahim je osvojio prva mjesta u disciplinama na 100, 200 i 400 metara.

Prije odlaska na ovo takmičenje načelnik općine Bužim Mersudin Nanić je ispratio Ibrahima Dizdarevića i poželio mu sreću i uspjeh na takmičenju.

Domaćin takmičenja, po četvrti put, bilo je Udruženje paraplegičara i oboljelih od dječije paralize Zenica, a učestvovalo je 90 takmičara iz cijele



BiH koji su se takmičili u šest atletske discipline i šahu. Proteklih godina ovo takmičenje je bilo i masovnije ali zbog poznate situacije sa korona virusom ove godine je smanjen broj takmičara.

PRVO MJESTO ZA ŠAHISTE RVI OPĆINE BUŽIM

Savez za sport i rekreaciju invalida općine Bužim danas je bio domaćin Kantonalnog prvenstva u šahu za invalidna lica, a učešće su uzele ekipe iz Velike Kladuše, Cazina i ekipa domaćina. Zbog pandemije korona virusa ostale ekipe sa područja Unsko-sanskog kantona nisu mogle prisustvovati ovogodišnjem kantonalnom prvenstvu u šahu za invalidna lica. Ove godine kantonalni prvak je ekipa Bužima, drugo mjesto pripalo je šahistima iz Cazina dok su treće mjesto osvojili šahisti iz Velike Kladuše. Najboljim ekipama su dodijeljeni pehari i priznanja, a takmičarima se obratio i načelnik općine Bužim Mersudin Nanić koji je posebno naglasio:

“Prije svega želim Vam čestitati današnjim pobjednicima ali i na današnjoj organizaciji ovog turnira koji pokazuje da se invalidna lica druže, takmiče i aktivni su učesnici društvenih događaja što je svakako za sve vas veoma bitno. Znam da ste u proteklom ratu dali svoj ogroman doprinos u odbrani domovine, a na nama mlađima je da vam pomognemo i da učinimo sve da se osjećate kao ravnopravni članovi naših zajednica. Općina Bužim će i u narednom periodu podržavati organizaciju ovakvih i sličnih takmičenja, a danas smo već dogovorili podršku prilikom odlaska na federalno takmičenje u šahu za invalidna lica”.



ORGANIZOVAN IV MEMORIJALNI ŠAHOVSKI TURNIR „ALMIN ĐULIĆ“

Udruženje distrofičara Bužim organizovalo je IV Memorijalni šahovski turnir „Almin Đulić“. Turnir je organizovan u sklopu programa obilježavanja Međunarodnog dana osoba sa invaliditetom, a u znak sjećanja na preminulog člana Šahovske sekcije Udruženja distrofičara Bužim.

-Međunarodni dan osoba sa invaliditetom je jedinstvena prilika da kroz ovakve aktivnosti ukažemo na mogućnosti koje osobe sa invaliditetom imaju, kazao je Samir Đulić, predsjednik Udruženja.

Turnir je svojim prisustvom uvećao općinski načelnik Mersudin Nanić, koji se kratko obratio prisutnim a potom svečano otvorio turnir. Na turniru je učestvovalo 15 igrača iz Bužima, Velike Kladuše, Cazina i Bihaća.

Turnir se igrao po švicarskom sistemu igre od 9 kola sa tempom igre od 10 minuta po igraču. Nakon odigranih devet kola, prvo mjesto, drugu godinu za redom, pripalo je Seadu Čauševiću iz Cazina, ispred Sabahta Hadžića iz Velike Kladuše i Muje Begića iz Cazina. Najbolji domaći igrač je bio Sead Šahinović sa osvojenih 5 poena. Udruženje je za prva tri mjesta obezbijedilo skromne novčane nagrade, diplome i pehar, a novčane nagrade i diplome su dodjeljene najboljem domaćem igraču i najstarijem učesniku. Za sve učesnike je bio priređen ručak kojim je turnir okončan. -Ovogodišnji šahovski memorijal smo organizovali zahvaljujući finansijskoj pomoći Šahovskog kluba Bužim kojem se ovim putem zahvaljujemo, dodao je Đulić.



KARATE KLUB BUŽIM BOGATIJI ZA 3 MAJSTORSKA ZVANJA

U periodu od 25. do 27.09.2020.godine u Sportsko rekreativnom centru – Ajdinovići, u organizaciji Karate saveza Federacije Bosne i Hercegovine održan je karate seminar “Ajdinovići 2020”.

Uz aktivnosti polaganja za majstorska zvanja od 1. do 5. Dana, održane su i pripreme seniorske reprezentacije Bosne i Hercegovine, kao i treninzi za perspektivne takmičare.

Seminaru je pristupilo preko 130 učesnika iz 40 karate klubova.

Sve aktivnosti seminara održane su u skladu sa svim higijensko epidemiološkim mjerama Covid 19.

Karate klub “Bužim” sudjelovao je na ovom događaju i postao bogatiji za tri “Majstora” karatea, oni su Grošić Humeid, Pajalić Ajla i Kovačević Elmedina.

Trener karate kluba Bužim Sejfo Mulalić izrazio zadovoljstvo postignutim rezultatima te naveo da se samo radom postižu ovakvi rezultati te da gore pomenuti članovi Karate kluba Bužim mogu biti primjer ostalima kako do zapaženih rezultata.



BUŽIMSKI BIKIKLISTI PEDALIRALI SREDNJOM BOSNOM

Da će 2020. godina ostati svima u sjećanju bilo je jasno već početkom godine. Usljed epidemije Korona virusa i uvođenja restriktivnih mjera za cijelo čovječanstvo, od zabrana kretanja, zabrana rada pa do policijskog sata i zatvaranja u 4 zida. Obični, mali čovjek ove prelijepe bosanske zemlje je počeo tražiti alternativu i više vremena provoditi u prirodi uživajući u svemu onom što mu ona nudi. Tako su članovi Biciklističkog kluba Bužim nakon što su obišli dosta izletišta u svojoj sredini odlučili da naprave jedan izlet van Krajine. Naime, prošlog vikenda, članovi ovog kluba su boravili u Srednjoj Bosni na malom izletu sa svojim dvotočkašima. Prvog dana vikenda su posjetili Fojnicu, gdje su biciklima sa Prokoškog jezera koje se



nalazi na nadmorskoj visini 1636 metara, pedalirali na Treskavicu, jedan od vrhova Vranice koji se nalazi na 2020 mnnv. Sa ovog vrha se pruža prelijep pogled na ostatak Dinaridskog planinskog lanaca. Da je Prokoško jezero i planina Vranica prelijepa posvjedočit će vam svako ko je kročio nogom na ovaj prostor, mnoštvo kanjona, zimzelenih šuma, prekrasnih livada planinskih visoravni i vijenaca niti jednog čovjeka neće ostaviti ravnodušnim i poželit će da što prije ponovo posjeti ova mjesta, navode iz biciklističkog kluba Bužim.

Drugog dana vikenda biciklisti su krenuli po zahtjevnom vremenu, jakom suncu i olujnom vjetru, da osvoje najviši vrh Vlašića (1933mnnv). Start je bio kod ski-staze (1240mnnv) u jutarnjim satima.

Da su mnogi stanovnici naše zemlje ostali zarobljeni usljed pandemije u BiH govori i činjenica da je mnoštvo planinara, sportista i turista ovog vikenda slobodno vrijeme provodilo na Vlašiću. Skoro na svakoj raskrsnici moglo se vidjeti po desetak auta od turista, kažu biciklisti.

„Nadamo se da ćemo potaknuti mlade, kako iz naše lokalne zajednice tako i iz cijele Krajine i Bosne i Hercegovine da što više vremena provode u prirodi, a što manje pred računarom i TV-om, te im poručujemo da se počnu baviti bilo kojim sportom, a ako nas pitaju neka njihov izbor bude brdski biciklizam. Mi se nismo pokajali našim izborom“ poručuju iz Biciklističkog kluba Bužim.

UDRUŽENJE SRD “ŠARAN” BUŽIM PORIBILO JEZERO BRANA VEĆOM KOLIČINOM RIBE

Na zadovoljstvo svih ribolovaca koji posjećuju jezero Brana Bužim proteklih dana izvršeno je novo veće poribljavanje jezera.

Riječ je o ukupno 350 kg ribe i to Šarana veličine 2-4 kg, Amura veličine 6-7kg i manja količina Linjaka i Tolstolobika kao i nekoliko komada Štuke. Najveći dio od ukupnog broja je Amur kojeg do sada nije bilo u ovom jezeru. Poribljavanje je financirano od strane Udruženja SRD “Šaran” Bužim većim dijelom, dok su manji dio sredstava kao dobrovoljne priloge prikupili članovi udruženja i ljubitelji ribolova.

Ovim poribljavanjem jezero je osvježeno i iz udruženja se nadaju da će i ribolovaca i ulova biti daleko više.

Do daljnjeg je na ovom jezeru zabranjen noćni ribolov.



EKIPA “VOZAČI OPĆINE BUŽIM” OSVAJAČ 24. MALONOGOMETNOG MEMORIJALNOG TURNIRA IZET NANIĆ

U Sportskoj dvorani Bužim je odigravanjem finalnih utakmica završen 24. Memorijalni malonogometni turnir “Izet Nanić”. Iako bez publike zbog pandemije koronavirusa turnir je itekako imao karakter borbenosti i sportskog adrenalina. U finalnoj utakmici snage su odmjerile ekipe “Mladost Mahmići” i “Vozači općine Bužim”. Visokom pobjedom 4:0 ekipa “Vozači općine Bužim” osvojila je ovogodišnji turnir Izet Nanić. Utakmica za treće mjesto igrana je između ekipa “Futsal klub Konjodor” i ekipa “Stolarija Hari”. Uspješnija je bila ekipa “FK Konjodor” koja je rezultatom 6:3 pobijedila protivničku ekipu i na taj način zauzela 3. mjesto na ovogodišnjem turniru.

Ovim utakmicama su prethodile utakmice U12 i U14 kategorija.

U kategoriji U 12 finale su igrale ekipe “MNK Vrhovska” i “ŠN Gomila Stijena”. Uspješnija je bila ekipa ekipa “ŠN Gomila Stijena” sa 2:0

U kategoriji U 14 finale su igrale ekipe “Hamid Latan” i “MNK Vrhovska Crveni”. Uspješnija je bila ekipa “Hamid Latan” pobjedom od 2:0.

Za najboljeg igrača turnira proglašen je Rifet Šahinović, najboljeg golmana Salim Karalić a najboljeg strijelca Adis Muhamedagić.



ODRŽAN PRVI “KUP BUŽIM 2020” U ULOVU RIBE UDICOM NA PLOVAK

Na jezeru Brana Bužim u sklopu manifestacije “Slobodarski dani viteškog grada Bužima 2020” uz poštivanje mjera zbog pandemije koronavirusa i bez publike održan Prvi KUP BUŽIM 2020. u disciplini “ulov ribe udicom na plovak”.



Učešće je uzelo 14 takmičara, a u fer i korektnom takmičenju najuspješniji je bio Mirvet-Mirza Cinac sa osvojenih 6450 bodova, drugo mjesto osvojio je Amir Ćosić sa 6360 bodova, dok je treće mjesto zauzeo Ćirkin Smajo, inače član susjednog udruženja “Štuka” iz Velike Kladuše sa osvojenih 5920 bodova. Najuspješnijima su dodijeljene medalje i diplome.

ODRŽAN IV CADETS & JUNIORS BOSNIA OPEN, BUŽIM 2020.

Proteklog vikenda u Bužimu je održan IV Cadets & juniors BOSNIA open, Bužim 2020, u organizaciji TKD kluba GAZIJA iz Bužima, a u sklopu manifestacije "Dani općine Bužim 2020.

Na turniru je učestvovalo 18 klubova iz 5 zemalja, sa 220 takmičara.

Generalni sponzori turnira bili su Vlada Unsko-Sanskog Kantona na čelu sa premijerom Mustafom Ružnićem, općina Bužim na čelu sa načelnikom Mersudinom Nanićem, te sportski savez Općine Bužim sa predsjednikom na čelu Admirom Sijamhodžićem.

Na samom otvaranju turnira prisutnima se obratio glavni sudija turnira Amir Tahić, predsjednik organizacionog odbora Senad Krupić i načelnik općine Bužim Mersudin Nanić, koji je ujedno i otvorio IV Bosnia open.

U prvom dijelu turnira odmjerene su snage i znanje u tehničkom dijelu taekwon-do-a tzv. Formama, nakon čega je upriličen ručak za sudije i trenere turnira, a goste, takmičare i roditelje TKD klub GAZIJA iznenadio je sa 4 torte različitih okusa.

Nakon pauze za ručak nastavljen je turnir u segmentu borbi koje su izazvale mnogo pažnje i uživanja svih gledatelja. Takmičarski dio završen je oko 18:00 nakon čega je otvoreno prvo ITF FIGHT NIGHT GALA EVENING.

Gala program su otvorili reprezentativci Bosne i Hercegovine u tehničkom dijelu u kategoriji crni pojas II dan gdje su snage odmjerili Nermin Kereš iz KBV Taekyon Sarajevo i Ajdin Salčin KBV Tornado Sarajevo. Pobjedu u ovom duelu nakon dvije odrađene forme odnio je Nermin Kereš.

Nakon seniorskog odmjeravanja snaga, snage su odmjerili i finalisti najzanimljivijih mečeva koji su odrađeni u toku dana. Centralni dio gala programa bile su seniorske borbe za novčanu nagradu od 200€ i pehar, gdje su snage odmjeravali predstavnici nacionalnih timova Ismail Hamulić KBS Tigar Cazin, Harun Šahinović TKD klub Hamza Bužim, Bojan Malešević TKD klub Prnjavor Prnjavor i Denis Drapić višestruki svjetski prvak u taekwon-do-u za nacionalni tim Slovenije a ispred matičnog kluba TKD klub Ahac Šentjur Slovenija.

U punoj sportskoj dvorani snage su prvi odmjerili Denis Drapić i Harun Šahinović, gdje je pobjedu odnio predstavnik Slovenije Denis Drapić. Druga polufinalna borba probudila je gledatelje koji su gromoglasnim navijanjem podržali Ismaila Hamulića koji je sa 70 kg odmjerio snage protiv teškaša od 92kg Bojana Maleševića, nakon čega je i odnio pobjedu, što je izazvalo oduševljenje kod gledalaca.

Finalna borba između Denisa Drapića i Ismaila Hamulića bila je puna tenzija i neizvjesna do samog kraja, a publika je bila podijeljena u navijanju, ali je na kraju ipak više iskustva presudilo pa je pobjedu finalne borbe odnio višestruki svjetski šampion Denis Drapić, čime je postao pobjednik prve gala večeri u Bužimu.

Na kraju večeri prisutnima se u ime Vlade USK i premijera Mustafe Ružnića obratio ministar gđin Asim Dizdarević koji je ujedno i primio zahvalnicu za generalnog sponzora turnira, nakon toga dodijeljene su nagrade i pehari za najbolje takmičare u pojedinačnoj kategoriji, te pehari za najbolje timove turnira. Pehare je dodijelio predsjednik Sportskog saveza općine Bužim.



NIZOM SADRŽAJA OBILJEŽENA 25. GODIŠNJICA PROGLAŠENJA OPĆINE BUŽIM



Nizom sadržaja u Bužimu je svečano obilježen Dan Općine Bužim. Ovaj herojski grad je kroz historiju dva puta gubio, a tri puta vraćao svoj status, koji mu je kao općini posljednji put vraćen 1995. godine, odlukom Ratnog predsjedništva BiH.

Obilježavanje 25-te godišnjice od dobijanja statusa općine počelo je prijemom za najmlađe Bužimljanke i Bužimljane, mališane JU "Dječiji vrtić" Bužim.

Nakon prijema povodom Dana Općine Bužim, predstavnici lokalne vlasti, JP „Ceste FBiH“ i izvođača radova potpisali su ugovor o rekonstrukciji raskrsnice na Trgu Alije Izetbegovića, odnosno izgradnji prvog bužimskog kružnog toka.

Riječ je o projektu vrijednom više od 1,3 miliona koji se naslanja na izgradnju zaobilaznice, koja je uvrštena u četverogodišnji plan Cesta FBiH. Bužim će ovim dobiti kružni tok, a radove će izvoditi domaća firma „KOV-GRAD“ d.o.o. Radovi bi trebali započeti za trideset dana, a nakon što bude izgrađen, kružni tok će olakšati i ubrzati kretanje vozila kroz gradsko jezgro.

Zatim je održan prijem zvaničnika u sali općine Bužim kojem su prisustvovali predstavnici vjerskog, kulturnog i političkog života općine Bužim, kao i zvaničnici.

Potom je upriličena organizovana posjeta Turbetu generala Izeta Nanića, gdje je odana počast svim šehidima, a nakon toga posjeta Muzeju sobi 505. Viteške brigade.

Akademija u povodu 25. godišnjice od ponovnog dobijanja statusa općine Bužim održana je u Velikoj sali JU "Centar za kulturu, sport i informisanje" Bužim.

Uvodničar je bio Sead Emrić, a nakon intoniranja himne i uvodne riječi prisutnima se obratio Samir Duranović, zamjenik Predsjedavajućeg OV Bužim.

Načelnik općine Bužim Mersudin Nanić je između ostalog govorio o stanju u općini Bužim, pobrojao niz uspješno realiziranih projekata u protekloj godini, te velike planove za tekuću godinu, od kojih se svakako izdvaja Kružni tok, Trga Alije Izetbegovića te skorog nastavka izgradnje bužimske obilaznice.

Svoje čestitke su prigodnim obraćanjima uputili i Asim Dizdarević, ministar Pravde u Vladi USK, te Bekir Isaković, izvršni direktor JP Ceste FBiH

Pročitane su i čestitke poslane u povodu Dana



SVEČANOM AKADEMIJOM OBILJEŽEN DAN NEZAVISNOSTI BiH U BUŽIMU



Kao i proteklih godina Općina Bužim zajedno sa JU "Centar za kulturu, sport i informisanje" organizirala je obilježavanje jednog od najvažnijih datuma u historiji Bosne i Hercegovine 1. marta – Dana nezavisnosti Bosne i Hercegovine. Obilježavanje je počelo obilaskom Turbeta generala Izeta Nanića i šehida 505. viteške brigade gdje su zvaničnici općine Bužim položili cvijeće i proučili fatihu najzaslužnijim sinovima za kontinuitet državnosti BiH.

Nakon toga u Velikoj sali JU "Centar za kulturu, sport i informisanje" Bužim održana je Svečana akademija u povodu obilježavanja 1. marta, Dana nezavisnosti Bosne i Hercegovine.

Svečanost je počela intoniranjem himne i čitanjem referata o Danu nezavisnosti BiH kojeg je pročitao referent za kulturu u Općini Bužim Sead Emrić.

Nakon toga uslijedilo je obraćanje i čestitka Općinskog načelnika Mersudina Nanića koji je naglasio između ostalog da ovaj datum u dugogodišnjoj historiji BiH zauzima posebno mjesto jer su se na taj dan 1992. godine građani ove zemlje odlučili za nezavisnu i suverenu Bosnu i Hercegovinu, državu svih ravnopravnih građana, te da ne smijemo zaboraviti žrtve koje su date za našu jedinu nam domovinu Bosnu i Hercegovinu i da samo cijelovita Bosna i Hercegovina država ravnopravnih naroda može biti država po mjeri svih nas. Svečanoj akademiji su prisustvovali brojni predstavnici političkog, javnog, kulturnog i vjerskog života ali i brojni građani Općine Bužim koji su došli da uveličaju ovaj veliki dan za našu državu.

U drugom dijelu programa nastupili su mališani JU "Dječiji vrtić Bužim, zatim OŠ Bužim, OŠ Mirsad Salkić, MSŠ Hasan Musić i Ženski gradski hor Bužim.




POSTAVLJENI JARBOLI I ZASTAVE NA TURBETU GENERALA IZETA NANIĆA



Pred sutrašnje obilježavanje jedne od najvećih bitaka i pobjeda pripadnika 105/505. Viteške brigade u akciji “Munja-93” u kojoj su skoro goloruki i slabo naoružani bužimski vitezovi izvojevali briljantnu pobjedu, na Turbetu generala Izeta Nanića i poginulih boraca 105/505. viteške brigade postavljeni su jarboli i zastave, te izvršena rekonstrukcija rasvjete. Nosilac ovog projekta je Udruženje 505. Viteške brigade, a sredstva su obezbijedena iz budžeta Općine Bužim. Radove na rekonstrukciji rasvjete izvelo je poduzeće “Stella”, a svoj doprinos u realizaciji ovog projekta pružili su i uposlenici JU”Centar za kulturu sport i informisanje” Bužim.

OBILJEŽENA 27. GODIŠNJICA BITKE “MUNJA 93“



Na današnji dan navršeno je dvadeset i sedam godina od izvođenja ratne operacije Munja '93, koju su izveli pripadnici 105. bužimske udarne brigade. Veliki broj posjetitelja i ove godine je došlo na poprište ove bitke da 11. januara obilježe veliku ratnu pobjedu kod Kedića Glavice, gdje je 2014. godine podignuto monumentalno spomen-obilježje.

Obilježavanje je počelo juče, tradicionalnim druženjem jedinica učesnika ove bitke u školi u Zaradostovu, odakle su ove jedinice kretale u boj, a nastavljeno je danas u jutarnjim satima posjetom Turbeta generala Izeta Nanića i poginulih boraca-šehida 505. viteške brdske brigade gdje su prisustvu brojnih građana Općine Bužim, predstavnici izvršene i zakonodavne vlasti USK, Općine Bužim i boračkih udruženja položili cvijeće i proučili Fatihu.

Delegacija je zatim posjetila Muzej sobu 505. Viteške brigade, a u isto vrijeme učesnici pješačenja “Ponosa i slave Munja '93” krenuli su prema poprištu slavne bitke i spomen-obilježju na Kedića Glavici. I ove je godine centralno obilježavanje ove velike pobjede bilo na Kedića Glavici gdje je prigodnom programom obilježena ova slavna bitka.

Tradicionalno imami MIZ Bužim proučili su Jasin a zatim je održan historijski čas i evocirane uspomene na slavnu bitku. Referat o ovoj slavnoj bitci, samom toku akcije pročitao je Sead Emrić. Delegacije su položile cvijeće a prisutnima su se zatim obratili načelnik Općine Bužim, Mersudin Nanić, Bos. Krupa, Armin Halitović, Ministar za pitanje boraca i RVI USK, Ermin Zulić, ratni komandant Odreda za specijalna dejstva Senad Šarganović, ratni komandanti 501. i 502. bihačke brigade Hamdija Abdić Tigar i Mirsad Selmanović te ratni Komandant 505. viteške brigade Sead Jusić.



OBILJEŽENA GODIŠNJICA FORMIRANJA ŠTABA TO BUŽIM I PRIJEMA RATNE ZASTAVE 105/505. VITEŠKE BRIGADE

Ni pandemija korona virusa nije spriječila Bužimljane da i ove godine obilježe dvadeset i osmu godišnjicu od formiranja Glavnog kriznog štaba i Štaba Teritorijalne odbrane Bužim i dvadeset i sedmu godišnjicu od prijema ratne zastave 105. Bužimske udarne muslimanske/krajiške brigade. Predstavnici Koordinacije boračkih udruženja sa područja općine Bužim, načelnik općine, predstavnici kantonalne i državne vlasti, te predstavnici vjerskog i društvenog života su u skladu sa trenutnom situacijom i pandemijom korona virusa skromno obilježili jedan od značajnijih datuma iz novije historije Bužima i tako odali dužnu počast svima onima koji su dali svoj doprinos u odbrani države Bosne i Hercegovine.



Uz poštivanje svih zaštitnih mjera, na Turbetu generala Izeta Nanića i šehida 505. Viteške brigade, proučena je Fatiha i održan karatak historijski sat, a prisutnima su se obratili Edham Eminić ispred koordinacije boračkih udruženja, načelnik općine Bužim Mersudin Nanić, Izet Ljubijankić i Esad Velić.

Načelnik općine Bužim Mersudin Nanić u svom obraćanju je posebno naglasio;

–“U situaciji kada se suočavamo sa pandemijom virusa nije primjereno držati govore ali svakako želim reći da je vrijeme da se isto tako organiziramo u ovom vremenu, kako ste se vi organizirali ratne 1992.godine možda u još težim uslovima. Jedinstvo koje ste vi tada pokazali su svima nama jasna poruka da samo tako i samo zajedničkim snagama možemo prevazići sve prepreke i izaći iz svega ovoga kao pobjednici”.

Uvodničar tribine bio je predsjednik Organizacionog odbora za obilježavanje značajnih datuma Edham Eminić. O civilnom i političkom ustrojstvu Kriznog štaba ZMZ Bužim početkom 1992.godine govorio je Izet Ljubijankić dok je o formiranju jedinica Teritorijalne odbrane, jedinica Civilne zaštite, pomoćnih kriznih štabova i vojne policije, govorio prvi komandant ŠTO Bužim Esad Velić.



U BUŽIMU OBILJEŽEN 15. APRIL, DAN ARMIJE R BiH

Povodom obilježavanja dvadeset i osme godišnjice od osnivanja Armije Republike Bosne i Hercegovine na Turbetu generala Izeta Nanića i poginulih pripadnika 505. Viteške brigade, položeno je cvijeće, proučena fatiha i održan kratak historijski sat uz prisustvo predstavnika koordinacije boračkih udruženja, kantonalnih poslanika, općinskih vijećnika, vjerskih službenika i direktora javnih preduzeća i ustanova, a poštujući aktualnu situaciju i naredbe o socijalnoj distanci vezanu za pandemiju korona virusa.

Ispred koordinacije boračkih udruženja općine Bužim prisutnima se obratio Edham Eminić, a načelnik općine Bužim Mersudin Nanić uputio je čestitku svim pripadnicima Armije R BiH i posebno istakao:

„Bužimljanke i Bužimljani se i nakon dvadeset i osam godina sa ponosom sjećaju svog komandanta, svojih vitezova i svih pripadnika Armije R BiH koji su stali na branik domovine kada je to bilo najpotrebnije.

Oni su nam svojim primjerom i žrtvom pokazali kako se pobjeđuje, a mi danas moramo biti zajedno kako bi nakon završetka ove pandemije bili pobjednici“. Ratni komandant 505. Viteške brigade Sead Jusić kratko je govorio o prvim danima otpora i ratnom putu brigade. Armija R BiH osnovana je 15. aprila 1992. godine, a taj datum se obilježava kao Dan Armije R BiH. Vrhovni zapovjednik bio je predsjednik Republike, a nakon Dejtonskog sporazuma, A R BiH je zajedno sa HVO-om formirala Vojsku Federacije BiH, da bi nakon reforme odbrane bila transformisana u “2. pješadijski (rendžerski) puk”, jedan od tri puka u okviru Oružanih snaga



U BUŽIMU OBILJEŽEN 12.06. DAN POLICIJE USK



Danas se obilježava Dan policije Unsko-sanskog kantona. Prije dvadeset i tri godine uspostavljanjem Unsko-sanskog kantona formirano je Ministarstvo unutrašnjih poslova.

S tim u vezi, u Bužimu je povodom Dana policije u Policijskoj stanici Bužim, komandir Samir Skenderović, upriličio prijem za načelnika Općine Bužim Mersudina Nanića sa saradnicima.

Načelnik Nanić čestitao je svim pripadnicima policije Unsko-sanskog kantona Dan policije, naglasivši njihovu posebnu ulogu oko pandemije i migrantske krize koja je prisutna u našoj zemlji.

Nakon prijema na turbetu generala Izeta Nanića i šehida 505. viteške, učenjem Fatihe i polaganjem cvijeća odana je počast poginulim pripadnicima Ministarstva unutrašnjih poslova i 505. Viteške brigade.



OTVORENA JUBILARNA DVADESET I PETA MANIFESTACIJA SLOBODARSKI DANI VITEŠKOG GRADA BUŽIMA 2020

Jubilarna dvadeset i peta manifestacija “Slobodarski dani viteškog grada Bužima” svečano je otvorena večeras na Turbetu generala Izeta Nanića i šehida 505. Viteške brigade. Niti prolom oblaka nije spriječio značajan broj bužimljana i gostiju da dostojanstveno obilježe početak ove manifestacije”.

Zbog epidemiološke situacije na području cijele Bosne i Hercegovine ovogodišnja manifestacija “Slobodarski dani viteškog grada Bužima 2020” nije započela predviđenim sadržajima koji su podrazumijevali okupljanje većeg broja ljudi. Organizacioni odbor manifestacije odlučio je, a prvenstveno zbog zaštite zdravlja ljudi, da reducira određene sadržaje, ali isto tako da



tradiciju obilježavanja pogibije generala Izeta Nanića i godišnjicu formiranja 105-505. Viteške brigade nastavi sa sadržajima koje je u ovim teškim epidemiološkim uslovima moguće organizirati uz poštovanje preporučenih mjera zaštite od strane nadležnih organa.

Ovogodišnja manifestacija kao i ranijih godina započela svečanim prijemom u zgradi općine Bužim, posjetom Spomen sobi 505. Viteške brigade, te učenjem Ja'sina na turbetu generala Izeta Nanića poginulim pripadnicima 505. Viteške brigade.

Nakon što su imami MIZ-a Bužim proučili Ja'sin, načelnik općine Mersudin Nanić je u kratkom obraćanju proglasio jubilarnu dvadeset i petu godišnjicu manifestacije “Slobodarski dani viteškog grada Bužima 2020” otvorenom.

U svom kratkom obraćanju prisutnima načelnik općine Mersudin Nanić je posebno naglasio:

“Nije vrijeme niti mjesto za velike govore i riječi. Vaš dolazak po ovakvom vremenu govori svima nama da smo i nakon dvadeset i pet godina još uvijek odlučni da obilježavamo značajne datume, sjećamo se našeg generala Izeta Nanića, poginulih boraca i njihovih porodica.

ratnih vojnih invalida i demobilisanih boraca koji su stali u odbranu domovine onda kada je to bilo najteže. Njihova žrtva i njihovo jedinstvo moraju nam biti vodilja u budućnosti jer samo zajedno i jedinstveno možemo očekivati prosperitetnu lokalnu zajednicu i uređenu državu za koju su se borili naši najbolji sinovi kojima danas odajemo dužno poštovanje”.



OBILJEŽENA DVADESET I PETA GODIŠNJICA OD POGIBIJE GENERALA IZETA NANIĆA

Posjetom mjestu pogibije generala Ize-
ta Nanića na Vijencu (R Hrvatska -nekoliko
kilometara od Ćorkovače), te učenjem Ja'si-
na za sve poginule šehide
505. Viteške brigade i
održanim historijskim
satom obilježeno je
dvadeset i pet godina od
pogibije generala Izeta
Nanića-komandanta bri-
gade.

Delegacija koju je pred-
vodio predsjednik Or-
gizacionog odbora
Edham Eminić sa načel-
nikom općine Bužim



Mersudinom Nanićem, državnim parlamentarcom Jasminom Emrićem, ministrom za pitanja boraca i ratnih
vojnih invalida u Vladi USK Erminom Zulićem, članovima porodica Nanić i Bašić, te bivšim pripadnicima
505.Viteške brigade posjetila je mjesto pogibije generala Izeta Nanića i njegovog obavještajca i desne ruke
Mehe Bašića, gdje su položili cvijeće i učenjem fatihe odali dužnu počast.

I pored veoma loših vremenskih uslova, te složene epidemiološke situacije u zemlji, tradicija posjete mjesta
pogibije generala Izeta Nanića i njegovih saboraca nije prekinuta.

Iako je Organizacioni odbor, a zbog navedenih epidemioloških uslova, odgodio ovogodišnji pješački pohod
“Putem bužimskih vitezova” na kojem se svake godine okupi po nekoliko stotina učesnika, najveći zaljubljenici
i poštovaoci bužimskih vitezova i njihovog komandanta nisu dopustili da se ova tradicija prekine. Po kiši koja
ih je pratila cijeli dan šezdesetak učesnika je iz Bužima stiglo do Ćorkovače pred početak zvaničnog programa
koji je ove godine bio malo izmijenjen i prilagođen nastalim uslovima.

Nakon učenja Ja'sina na platou Spomen obilježja “PONOSA I POBJEDA” okupljenim bužimljanima, te gostima
iz Busovače, Doboja, Kozarca, Tuzle, Zenice i Sarajeva obratili su se načelnik općine Mersudin Nanić, predsjed-
nik udruženja najvećih ratnih priznanja i odlikovanja Alija Redžić, ratni komandant 505.Viteške brigade Sead
Jusić i muftija bihački Mehmed ef. Kudić.

U svom obraćanju načelnik općine Bužim Mersudin Nanić je posebno naglasio:

”Moramo se sjećati našeg generala Izeta Nanića i svih naših boraca i šehida koji su nam omogućili da danas
uživamo u slobodi koju su nam podarili. Moramo biti jedinstveni i složni u izgradnji države za koju su oni
najbolji dali svoje živote. Moramo to znati cijeniti, moramo to poštovati i moramo prenositi generacijama koje
dolaze istinu. Istina uvijek pobjeđuje i istina se nikada ne zaboravlja.”

Ratni komandant 505.Viteške brigade Sead Jusić u svom obraćanju je posebno naglasio važnost izgrađenog
Spomen obilježja PONOSA I POBJEDA na Ćorkovači kao trajnoj uspomeni na herojsku borbu bužimskih
vitezova. Povodom napisao u hrvatskim medijima i tvrdnje “kako je hrvatska vojska spasila bihački Okrug”,
Jusić je naglasio da takva tvrdnja ne stoji, te da je 5.Korpus vezao nekoliko hiljada vojnika tzv.Srpske Krajine,
Vojske RS-a i drugih jedinica. Da nije bilo 5.Korpusa i njegovih jedinica zasigurno bi Hrvatska danas savim
drugačije izgledala-zaključio je Jusić.

Muftija bihački Mehmed ef.Kudić je ispred muftijstva dodijelio priznanja općini Bužim i Medžlisu IZ Bužim za
poseban doprinos u organizaciji Slobodarskih dana viteškog grada Bužima i očuvanja tradicije ove manifestac-
ije. Priznanja su primili načelnik općine Bužim Mersudin Nanić i ef. Eniz Veladžić.

OBILJEŽENA 26. GODIŠNJICA BITKE “BREZA 94”, VELIKE POBJEDE 505. VITEŠKE BRIGADE

Centralno obilježavanje ove bitke upriličeno je na spomen obilježju na lokaciji Sip-Križ, mjestu gdje se desila bitka “Breza ‘94”. Obilježavanje je počelo u srijedu a nastavljeno u četvrtak promocijama knjige “Breza ‘94” autora Seada Jusića u Cazinu i Bosanskoj Krupi 09.09.2020. i 10.09.2020. godine. Također, nastavljeno je 12.09.2020. godine odigravanjem Šahovskog turnira, obilaskom turbeta Generala Izeta Nanića i šehida 505. viteške brigade, te centralnim obilježavanjem na samom poprištu ove bitke na spomen obilježju na lokaciji Sip-Križ gdje se i desila ova velika bitka. Delegacije su položile cvijeće i proučile fatihe na Turbretu generala Izeta Nanića i Šehida 505. viteške brigade, a zatim u velikom broju na poprištu same bitke na lokaciji Križ-Sip pri-



godnim obraćanjem te historijskim časom obilježile 26. godišnjicu presudne bitke za Bužim i USK. Nakon intoniranja himne, uvod i referat o bitci “Breza 94” prisutnima je pročitao Sead Emrić, referent za kulturu općine Bužim. Stihove svoje nove knjige koja je trebala biti promovisana večeras recitirao je autor Nijaz ef. Hadžić. Prisutnima se obratio u ime domaćina i organizatora, načelnik općine Bužim Mersudin Nanić, koji je dao do znanja da Bužimljanke i Bužimljani, kao i institucija općine Bužim nikad neće zaboraviti velike bitke te njihovu presudnu ulogu za opstanak Bošnjaka na ovom dijelu Bosne i Hercegovine. O bitci je govorio i Sead Jusić, ratni komandant 505. viteške brigade, a nakon njega i ministar za pitanja boraca u Vladi USK Ermin Zulić, kao i Mirsad Selmanović, ratni načelnik štaba 5. Korupusa Armije R BiH. Bužimljani su unatoč ograničenjima u vezi sa aktualnom situacijom ipak dostojanstveno kao i ranijih godina obilježili i ovu 26. godišnjicu jedne od najvećih bitaka 505. viteške bužimske brigade.

U BUŽIMU OBILJEŽEN 25. NOVEMBAR, DAN DRŽAVNOSTI BIH

Kako je i najavljeno ovogodišnje obilježavanje 25. novembra Dana državnosti BiH proteklo je u skladu sa aktualnim naredbama i preporukama kriznih štavova zbog pandemije korona virusa.

Tako je delegacija svih nivoa vlasti u 17:00 sati obišla turbe generala Izeta Nanića i šehida 505. viteške gdje je proučena fatiha. U 18:00 sati na spomeniku pobjeda i ponosa na Ćorkovači istim povodom puštena je u rad novoinstalirana rasvjeta na spomeniku. Rasvjetu su u pogon pustili načelnik općine Bužim Mersudin Nanić i predsjednik udruženja dobitnika najviših ratnih priznanja i odlikovanja općine Bužim Safet Džižo Isaković. Nakon toga intonirana je himna Bosne i Hercegovine te pročitao referat o hiljadugodišnjoj bosanskohercegovačkoj državnosti. Prisutnima su se obratili Edham Eminić, predsjednik koordinacije boračkih udruženja općine Bužim, a nakon njega čestitku prisutnima ali i svim građanima općine Bužim uputio je načelnik Mersudin Nanić: “Danas se obilježava sedamdeset i sedma godišnjica prvog zasjedanja ZAVNOBiH-a na kojem su obnovljeni temelji državnosti Bosne i Hercegovine. Tim povodom svim građankama i građanima Bosne i Hercegovine u zemlji i dijaspori, a posebno svojim sugrađankama i sugrađanima želim čestitati DAN DRŽAVNOSTI BOSNE i HERCEGOVINE. Posebno želim istaknuti da nas ovaj historijski datum obavezuje da u miru, u duhu suvereniteta i multikulturalnosti bosanskohercegovačkog društva gradimo bolju, uspješniju i ljepšu Bosnu i Hercegovinu.





BUŽIM